



## TAPAK 10

### Badminton Asia Championships: PV Sindhu Quarterfinal-i iogo



## TAPAK 7

### Mongin Actor Vinod Khanna alima nungi pilaogo

VOL. XIV NO. 188 (ADOK 188)

DIMAPUR

FRIDAY

APRIL 28, 2017

5.00

## NTC-i sorkar nem tenüngsang agütsü

**Kohima, April 27 (TYO):** Chief Minister, Shurhozelie Liezietsu-i aniba state sorkari, Rongmei kinji Nagaland nung indigenous Naga tribe rongnung ka ta züngokba meyipa agiba atema sorkar nem tenüngsang agütsür, ta tanü Media Cell, NTC-i sangdong ka nung metetdaksü.

Cabinet-i telemtetba agiba ajanga tangbo iba mangatetep ken o aser iba ken o ajanga lokti balala tsünda mepetmesü aliba agienogo, ta NTC-isa ashi.

"Iba ya shisa taka telemtetba

ka lir aser yimtenren nung shisa taka mapa ka lir, anungji iba telemtetba pelaa agizüker," ta sangdong nungsa shia lir.

Ano külen NTC-isa sorkar dang Rongmei indigenous inhabitants parnok 1313 aser parnok dak jakzükertem züngsemba atema kanga kümdanga inyaksüla, ta metetdaksü.

Jungjunga bushisüngdang mesü tang züngoka alirtem agizükba inyakim den mapet süra ibajibo tashishitsü asütsü, ta NTC sangdong nungsa shia lir.

## Tarutsü tia latettsü atema Naga nunger dak temeten lir: NSCN-IM

**Guwahati, April 27 (Agencies):** Centre den ceasefire yanglua aliba telok, NSCN-IM-i, Naga nungeri parnok tarutsü tia latettsü atema Naga nunger dak temeten lir, ta metetdaksü.

Brihostibarnü NSCN-IM-i sangdong ka ajanga, "NSCN-i Naga tribal Councils aser Arogotem densema Naga nunger lokti balala den jembitsü atema mera agi. NSCN-i Naga nunger lokti tentetem den jembiba mapang parnoki tang India aser NSCN na tsünda yimjung ken o nung akokba tashi nungitsü metetdaksüogo," ta ashi.

Parnokisa, "Ibaji meyipja NSCN-ia tesüiba mapangtem toktsür Naga nunger ajak dang yimjung maparen nung shilem agitsü atema tayongzükba ola agütsüogo. Tang teinyakdak maparen ya NSCN aser Naga

nunger lokti tentetem tsünda tangatetep tajung kati arua, India den ken o jembidang NSCN ji Naga nunger taginüba aser temetentem asoshi jembirtem lir ta asütsü atema lir," ta ashi.

"Akhidang nungi aliba ali ka küma longjemtsü- Nagalim ji Naga nunger taginüba lir. Naga nungerji parnok meyong li nung alir," ta NSCN-IM-i shisem.

NSCN-IM-isa, "Naga nungeri külemi linübaji kecha balaka masü saka tim dang. Naga nunger maneni pei li nungsa alitsü, ajisüaka atangji putiotsü kaji, British nunger aser India-i Nagalim ya mashimashi lemsatsü. Anungji Naga nungeri pei maitsü aser temetentem atema pei litsü longjemner. Iba jagi Naga nungeri pei tarutsü tia lemtettsü atema temeten aginüba sayur," ta metetdaksü.

## Mkg nung 21 buba Watsü Mungdang lokti senden akar

**Mokokchung, April 27 (TYO):** 21 buba Watsü Mungdang lokti senden sentong "Aowli Temelenshi" omen nung ajemdaker tanü yangi Mokokchung town hall nung meraketa tenzükogo. Iba sentong nung Watsü Mungdang telen balala nungi watsülartem noklang aika adenshia shilem agidar.

Tanü iba sentong nung tongti o jembir NPSC züngsem Wt. Chubala Wai-i, lokti nung temelenshi asoshi mezüngbuba pei jaklaliru aser mulungsentsü melenshitsübaji kanga tongtibang lir, ta metetdaksü.

"Naga nungeri timtem tuoshi agia timi inyakba inyakim maginür saka mapa ajak nung lenmang temelaba aser tezüpaba asa-a inyaksü jangrar, ibayongji asenoki tangar memeneper", ta laisa ashi.

Laisa shisaliok tsütsü onük kar lemsatetpang, "Naga nungeri education bushiba ya sorkar mapa inyaksü nükjidong nung dang azünger, iba jagi shisaliok tsütsü temelenshi kecha madoker", ta ashi. "Shisaliok bushibaji pei kisüng atema masü

saka lokti atema bilema azüngtsüla," ta laisa ayongzük.

Laisa temelenshi adokdaksütsü asoshi watsü nem inyakdaksünüba kar ashidang, tangar dak nendaka malitsüla, rongsen junga ketdang sütettsüla, aluyimba yimya melenshitsüla, science & technology ya Ao oshi nung meyipa züngdaksütsüla, pressure group ka tenzüktsüla, timyim inyakba alitsüla, school tatem tashi mezüngi toktsür tetsürtem anidena parnok dang lenmang sayutsüla.

Ajak dak alia pei chirnurtem kaketriju tajung nung züngdaksütsüla, kechiyong temelenshi bener aruba maparen nung shisaliokji tongtoret lir, ta laisa tayongzükba ka agütsü.

Sentong nung Watsü Mungdang tir Wt. Moachila-i tarur ajak pela agizük. Mokokchung SDO (C) Wt. Lemlila, Ao Kaketshir Mungdang tir Sp. Imkongwati aser taoba Fazl Ali College Principal Wt. Chubayangla nungeria tepela o den tayongzükba o tulu bener arua mungdangsanger ayongzükba liasü.

## Ali rongsen agitettsü atema shisaliok tajung nungdaker: Acharya



Convention Centre, Kohima nung Horticulture Department kum 25 ajungba Silver Jubilee souvenir sayatsüba sülen state Angh, PB Acharya aser Parliamentary Secretary Kejong Chang den department ketdangsertem külemi tangokba noksa ka angur. (Kohima, April 27, 2017)

**Kohima, April 27 (TYO):** Brihostibarnü Capital Convention Centre, Kohima nung Horticulture Department kum 25 ajungba Silver Jubilee mung mungogo, aser iba sentong nung tongti tesemdangerji, Nagaland aser Arunachal Pradesh Angh, P.B. Acharya liasü.

Tongti tesemdanger o jembidang Angh-i, Nagaland nem ali temo moaja lir, iba den külemi anü tashi, mineral, totzü, hydro, mozü yangluba süngolio densema ali nungi adokba rongsen moaja lir, ajisüaka item rongsenji agitsü atema shisaliok tajung nungdakra den külemi aluyimertem nem training agütsütsü nungdaker, ta metetdaksü.

Iba dak sendakba nung Angh-i department dang aluyimertem indang facilities aser welfare projects atema inyaksüla aser item scheme ji aluyimertem ket tongtsütsüla, ta metetdaksü.

Paisa, iba nungji aluyimertem jenjang majungkettsüra parnoki züsentetba jenjang majungtsü mesüra state kecha nunga rongsenkettsüng jenjang

majungkettsü, ta ashi. Tesasaba olen ka nung Angh-i, tang tashi Nagaland-i parnok peritsüsa mezüsenter saka chiyungtsü aser shi atema tanga state tem dak metaloker, ta ashi.

"Nagaland state nem ali temo moaja lir aser süngjanglijang balala den aonsotsü balala tsünütsü atema tsüngsang-mopung tapet moaja lir, anungji department-i mozü mamshii adokdaksüba aonsotsütem züsentetba jenjang tajungba kümdaksütsü atema inyaksüla aser züsentetbatemji shishilembatsü atema ajungtsütsü," ta paisa ashi.

Angh-i horticulture ketdangsertem danga, iba dak alia langka inyaksü nenok dak imlar, koba ajanga department jenjang temabai atutsü, ta ashi.

Angh-isa, Nagaland nung nütsüng lakh 20 shi nungi graduates lakh 3 shi dang lir, saka graduates timbaka tanga state tem nung inyaker, aser tanga state tem takar kümdaksür, ta ashi.

Pai ashiba agi, tanga yimitem nung inyaker lanurtem atema

yangi mapa maongka bushitsütsüla, aser iba atemaji ochimashi ajema kümdaksütsüla, koba ajanga parnok state-i meyipa arur mapa meranga inyaka Nagaland ya tashitait state ka kümdaksütsü.

Angh-isa Horticulture Department kum 25 ajungba souvenir sayaja liasü.

Kasa sentong nung Horticulture Parliamentary Secretary, Kejong Chang-ia state nung tanga department ajak dang horticulture department ya tongtibang department ka lir, anungji department ajaki nungita yaridaksünner, ta mepishia metetdaksü.

Jubilee benjungmung sentong ya Horticulture Department Secretary, Alan Gonmei leniba nung agia liasü aser NBCC Youth Secretary, Rev. Vikuo Rhi-i sarasadema sentong tenzükba liasü.

Horticulture Department indang Garden Band-i ken ajanga shilem agi aser Horticulture Joint Director, Dr. R.E Lotha-i tepela anküp o jembia liasü.

## Jakhama nung MGNREGA water reservoir tank semzüktsü



Kohima, April 27, 2017: Brihostibarnü Jakhama nung RD Secy., Kelei Zeliang aser tangartem tangokba noksa angur.

**Kohima, April 27 (TYO):** Higher Secondary School aser Jakhama sensotem atema tanü Jakhama village nung RD Secretary, Kelei Zeliang IAS-i MGNREGS Special Project 2016-17 kübok tzü litre 120,000 capacity water tank reservoir ka semzüktsüogo.

Iba project nung sen lakh 20 shi indok aser iba reservoir ajanga St. Josephs College, Loyola

Iba sentong nung jembidang Kelei-i, iba ya department aser yim atema teinyaktetba tuluka lir, ta ashiba den külemi iba project mapang shitak nung takok ngua tembangba atema construction committee aser Village Council nem tenüngsang agütsü.

Paisa, RD department-i lenla

ajaklen terenlok alitsü atema kibok shia taküm jenjang tajungba kümdaksütsü asoshi rangloker inyaker, ta metetdaksü.

Paisa tesem nung alirtem dang, cardamom (elaichi) tsünütsüla aser ak ajetsüla, kechiyong iba tesem ya item project inyaksü atema tapet, ta metetdaksü.

"Ner yim den apert project inyaksüla, nenoki meranga inyakba ajanga süngjang tajung tangtsütsü," ta paisa shisem.

Project osang metetdakja Ar. Zavishio Khieya-i, water reservoir ya RCC lir aser bonglang den wall ji inch 10 temelem lir aser temaba slab ji inch 4 temelem lir, ta metetdaksü.

Iba sentong ya JVC Chairman, Dr. Nolesol Zhotso leniba nung agi aser Asst. Catechist, Koleto-i sarasadema liasü.



## PHED Minister-i Wokha town water supply project semdang



**Wokha, April 27, 2017: Brihostibarnü state PHED Minister, Chotisuh Sazo-i Engorotchu ayong nung Wokha town water supply project semdangba mapang tangokba noksa nung angur.**

**Wokha, April 27 (TYO):** Non-Lapsable Central Pool of Resources (NLCPR) project dak sendakba nung tanü PHED Minister, Chotisuh Sazo-i Wokha town water supply project semdanga liasü.

Minister den PHED Chief Engineer, Er. Kevisekho Kruse, Wokha Deputy Commissioner, Department nungi ketdangsertem aser lokti lenirtema liasü.

Iba project kodang tembanga inyakdir, iba ya

ajanga Engorotchu ayong nungi tzü atsüa Wokha jila atema anogoshia tzü 3.75 million litre tali agütsütsü imlar.

Tanü minister-i anir ketdangsertemi semdangba mapang civil construction oset balala, electrical aser pumping unit installations mapatem tatemer dang ta busitet aser kobi melii iba mapa semzüksütsü imlar.

Iba projet semzükba ajanga nürburtem nem tzü tajemtsü tajung peria agütsütsü aser jila

nung tzü agi anüngba teblemstü koktettsü. Iba dak alia online payment inyakyim ajanga department saru tajungba akumtsü imlar.

Iba project semdangba sülen Minister Sazo-isa tang Wokha jilai supply tesüdak Etchuchuka semdangga liasü. Iba ya ajanga anogoshia tzü 1.75 million litre supply asür.

PHED ya tamalen PWD nung reptepa liasü saka 1974 küm julira Department ka akum.

## Gauhati University-i Tasile nem Honorary degree agütsütsü

**Kohima, April 27 (TYO):** April 28, 2017 nü Gauhati nung 26buba Gauhati University convocation alidang Nagaland nungi Kr. Tasile N Zeliang nem University-i Honoris Causa (Honorary Doctorate Degree) agütsütsü, ta tanü Raj Bhavan osang ka ajanga metetdaksü.

Lai Nagaland nung shisaliok, saisapong, kaketzüluba aser

loktiliba atema ariabelema meranga inyakba mapa tajung reprangteta Gauhati University-i la nem iba tetushi agütsü.

Nagaland aser Arunachal Pradesh Angh, P.B. Acharya Assan Angh aser Gauhati University Chancellor inyakba mapang nung pai University dang lenla balala nung nendaka inyaktertem nem honorary

degrees agütsütsü atema benoka liasü, aser tang mezüngsüa University-i 26buba convocation nung Honoris Causa (Honorary Doctorate Degree) agütsütsü, ta kasa osang ajanga ashi.

Mapangshia Acharya-i University tem dang loktiliba atema junga inyaktertem mapa tajung reprangteta tapet tetushi agütsütsü ajungshia arur.

## VHSNC atema training agütsürtem nem training agütsü

**Dimapur, April 27 (TYO) :** Govt. of India tetuyuba nung aliba ama VHSNC mesüra VHC (Village Health Committee) tem nem parnok teinyaktsütem angatetdaksütsü aser tangatetba nung renlokdaksütsü mechi nung anogo asemnü munga Village Health Sanitation & Nutrition Committee (VHSNC) atema training agütsürtem nem training agütsüba {Training of Trainers (ToT)} sentong April 26, 2017 nü nungi tenzüka Conference Hall of Directorate of Health & Family Welfare (DoH&FW) nung agidar.

District tem nungi iba sentong nung shilem agütsü asoshi arurtem agizükba mapang State Program Officer (SPO), NHM, Nagaland, Dr.Thanghoi Lam-i, iba training ya asate nung anema aliyim tsütsü temelenshi adokdaksüba mezüng mera alitsü, ta ashi.

Pai, iba sentong nung adener

ajaki iba training kanga süoki ia agütsü ayongzüker, ta ashi.

Joint Director Planning and Project Director, National Health Project (world Bank), Dr.Vizolie Suokhrie-i tarurtem den Communitisation Act 2002 nung tuyua aliba sorkar sentong lemsatop aser sorkari iba Act nung aliba reprangshitsü sentong renemba metetdaksü. Balakata iba asoshi inyaktertemji yimtsüng shia nung tetsür aser tebur shilem kasa asütsü indang pai rateta ashi.

Pai, asenoki District Head quarter dak dang temlung agütsür saka yimtsüng jenjangbo züzüi toktsür, ta ashi.

Adl. Director, H&FW, Dr.Limaakum Jamir-ia, training agütsütsüpur dang kanga nendaka inyaksü ashi aser iba training ya mapa tena agiba training ka asütsüla, ta ashi. Asenoki pei tata mapa nendaka meiyakba ajanga temang amena

ali mali jangjaba inyakyim kanga ajema kümogo, ta pai ashi.

Iba ToT sülen training agürtemi District aser Block level nung training agütsütsü.

Iba sentong nung shisalen sayurtemji, Project Officer-Operations (UNDP), Wb. Rajesh Khartu Mousang, Program Manager, Training, NHM, Wb. Puni Kokho, aser Community Mobilisor, RRC-NE, Wb.Amit nung lir. Iba training ya State Health Society, National Health Mission, Department of Health & Family Welfare-i ayong aser training agir rongnung Dy.Chief Medical Officer tem, District Immunisation Officer tem, District Program Managers (NHM) tem, District Media Officers (NHM) tem, District Community Mobilisors (NHM) tem aser Dy. MEIOs & MEIOs (IEC Bureau, DoH&FW) tem dena lir.



**Brihostiobarnü Chief Minister Dr. Shürhözeli Liezietsu den Kohima DC, Rajesh Soundararajan, administrative officials aser cost free Energy Efficient Bulbs angurtem kar dena CM Secretariat office nung külemi agiba noksa ka yangi angur.**



### OFFICE OF THE AO SENDEN

H.Q: MOKOKCHUNG : NAGALAND  
Ph: 0369-2228896/ e-mail: aosenden@gmail.com

Date: 27-04-2017

## SANGDONGER

Ao kin meraket sobaliba aser temeden wazüka ayutsü nükjiding nung Ao Senden küpok atalokba kenotem tatsüalang ajak mapang agia Federal Council nung lemteper külen Ao Senden sapang nungi lemtet kobasa sangdong agütsüogo, item lemtet anema senso shingaia osangkaket mesüra social media kecha nunga mesangdongtsü March 31, 2016 anogo sangdong agüja liaka tawa tanü osangkaket balala ajanga Ao Senden lemtet anema nisung kari sangdong agütsüba nung senso shinga memangmangtsü mesüra memetsüdaksü kerüh-kerüha sangdonger. Kechiyong alima nung alir meimchir rongnung aibelener temji tenük ka dang saka ochishir tenük ter agi kuli abensatsür asünungji senso kari danga Ao Senden lemtet nung tangatetnüba keno kar lira Ao Senden sabangi arua angatetteptsü kishi lapoka lir ta Ao Senden mendenti nungi sangdonger.

Sd/  
C Angang Jamir,  
Acting President

Sd/-  
L Tally Lkr.  
Acting Secretary.



*April 27, 2017 nü Mokokchung district kübok Ungma Baptist Arogo nung people with disability (PWDs) nem Wheel Chair lemtsüba senotng ka agidang taongokba noksa nung angur. Iba sentong ya 44 Assam Rifle Mokokchung-i yaritepa agi. Akumtemsu CBRW leniba nung iba sentong agi aser Care and support Society (C&SS) Director, Imchawati Kichu-i lokti pelaa agizükba den okila jembia liasü. Iba sentong atema Village Council Chairman Ungma aser Ungma Baptist Arogo Pastor-i Mokokchung sensotem atema C& SS-i mapa tajung inyakba atema pelaba lemsatopa liasü. (Mokokchung, April 27, 2017)*

## Tanü AHOds & HOds senden ayonger

**Dimapur, April 27 (TYO):** AHOds aser HOds ajak iba April 28, 2017 nikongdang senden nung medema adentsü Secretariat conference hall, Nagaland Chief Secretary, Kohima nung Administrative Pankaj Kumar, IAS-i Heads of Department aser metetdaksüogo, ta Information Head of Departments rongdak Cell, Secretariat-i sangdong ka senden ka amentsü, anungji nung metetdaksü.

## Technical Dept-i sangdonger

**Dimapur, April 27 (TYO):** Directorate of Technical Education-i sangdong ka ajanga, Para- Medical aser Agri & Allied Degree courses atema Nagaland State Entrance Examination (NSEE) 2017 application form issue asütsü aser application agizüksü tatembangbuba anogoji May 4, 2017 nü lir, ta metetdaksü.

## UGC-i nürburtem dang metetdaksür

**Dimapur, April 27 (TYO) :** 2016-17 nungi 2019-20 tashi Sam Higginbottom Institute of Agriculture, Technology & Sciences (SHIATS), Allahabad ajanga 'distance education programme' agütsütsü nokdang, ta University Grants Commission (UGC)-i metetdaksü.

Iba sangdong ya UGC, Joint Secretary, Dr. Avichal Kapur-i UGC, Act 1956 (as amended) nung aliba ama F.No. 52-1/2016 (DEB-III dated 24th April, 2017, nürburtem dangi sangdong) kübok metetdaksü.

Sam Higginbottom Institute of Agriculture, Technology & Sciences (SHIATS), Allahabad nung 2016-17 nungi 2019-20 tashi distance education atema tenüng magütsütsü metetdaksür.

Anungji nürbur shingaia Sam Higginbottom Institute of Agriculture, Technology & Sciences (SHIATS), Allahabad nung 2016-17 nungi 2019-20 tashi distance education atema tenüng magütsütsü metetdaksür.





Imphal, April 27 : Tawa district tasen kümtetba Kangpokpi nung Brehostibarnü, District Social Welfare Office aser District Information Office complex lapoktsüdang yimdaklirtemi Manipur Chief Minister, Nongthombam Biren Singh nem tetushi agütsüba mapang tangokba noksa nung angur.

## NIELIT-i Tripura lanur 8000 nem tesayuba agütsütsü nükjidong ayur

**Agartala, April 27 (Agencies):** Ministry of Electronics & IT kübok Autonomous Scientific Society, National Institute of Electronics and Information Technology (NIELIT),-i taruba küm 4 tsüngda nung Tripura nung lanur 8,000 tashi sayutetsü asoshi nükjidong yuogo.

NIELIT, Director General (DG), Dr Ashwini Kumar Sharma-i tanü ashiba agi, parnoki lanur mapa makar class 8 tashi dang zünger alirtem industry balala asoshi nüngdakba tesayuba agüja, industry tem nung nübo nüngdaker saka training shidak agir aliba nübo ajema aliba tawa ajema kümdaktsütsü asoshi tali temolung agüja inyaktüsü.

Iba institution nung tesayuba agütsütsü aliba course tem ya, National Skill Qualification

Framework (NSQF) den külemi yanglu aser iba ajanga; consumer electronics, medical electronics, computer hardware, telecom, office automation, networking aser embedded system nung tesayuba agütsütsü, ta paisa ashi.

NIELIT ajanga IT, electronics, communication technologies, hardware, cyber law, cyber security, cloud computing, ESDM aser e-Governance amala nung nübürtem nem tesayuba agüja arudar aser iba den külemi shisaliok lenla ajak nung tesayuba balala agütsür.

Pai maneni NIELIT Kohima ajanga Nagaland nung backward district 4 nungi maongka manguba lanur aser tetsürtem ajungkettsü asoshi parnok nem maongka agütsüba shisem. Ano NIELIT Guwahati

ajangaa Silchar centre nung medical electronics laboratory ka amenlokba pai shisema liasü. Iba medical electronics laboratory ya Assam nung mozüki balala indang medical electronics osettem anepalua yanglushitsü asoshi amenlok. Mozüki nung osettem mapa meinyakba ajanga nübürtem aser iba den külem mozüki inyakyim nung timtem adokdaksübatem parnoki anepalur.

NIELIT Imphal aser Guwahati-i 'spam mail' tem bendena asadangsü aser iba nungi ngutetba osang lemsateptsü asoshi anti-spam coordination centre amenlokdar. NIELIT Imphal-i ano 'e-Governance' amshiyim nung SC&ST kaketshirtem nem tesayuba balala agütsüdar, ta Dr Sharma-i shisem.

## Aso 21buba ya Congress yimli tembangba mapang lir: BJYM

**Shillong, April 27 (Agencies):** Aso 21buba ya India linük nung Congress yimli tatembangi aruba mapang lir aser taruba Assembly Election 2018, Meghalaya nung parnok tangola tatempang sashitsü, ta Bharatiya Janata Yuva Morcha (BJYM)-i ashi.

State nung Congress telok indang ostü kaketsür nung Dr. Mukul Sangma ya Chief Minister tatembangba liasü, ta zülüoka ayutsü aser pa yimli 2018 tashi nung jungjunga

tembangtsü, ta BJYM-isa ashi. "Meghalaya sorkar sen agimar, yimsüsür tashi mait aser department ajunga nung ochimashi liaka taruba election sülen Congress telok dangi state nung yimsü asütsü asoshi tashi arutsü, ta Meghalaya Pradesh Youth Congress (MPYC)-i bilemba ya aria bilemetsür," ta BJYM tir, Egenstar Kurkalang-i osangbener dang ashi.

"Tetsürtem dak mapa tamajung inyakba timba

akümer, kaketshir temi kaketsür timba akümer, mapa mongui aliba lanurtem timba akümer, yimsüngtem nung terenlok kicha mali, nübürtem meyong sen aliba agi minister tem shi-azü nung südoksünemtsü asoshi benjung balala ayongzüka amonger," ta paisa ashi.

"Item inyakyim ajunga asadanger MUA-II sorkar dang ya benjung aser südoksünem sorkar ta ajatsü tetemtsü," ta Kurkalang-isa ashi.

## Facebook post ka mechi Assam DySP ka timtem nung lir

**Guwahati, April 27 (Agencies):** Assam nung BJP legislator tetsür ka anema tim masüba o kar Facebook nung zülutsüba sülen Deputy Superintendent of Police (DySP) ka anema ken o benoka lir.

"Tetsür MLA ka anema pai Bodhbarnü ashishitsü o zülüba ngua Department temzüng nung aliba ama merenshitsü asoshi sorkar dangi onoki zülüogo aser pa anema ken o ka CID nem agütsüogo," ta Assam Police indang Director-General,

Mukesh Sahay-i osangbener dang ashi.

DySP Anjan Bora ya tang Manja, Karbi Anglong nung aliba 23rd Assam Police Battalion nung Deputy Commandant lir aser pai BJP telok nungi MLA tetsür ka anema ashishitsü o kar Facebook nung Bodhbarnü zülutsü.


Assam Assembly nung BJP telok nungi tetsür MLA ana lir aser Bora-i tetsür ka indang tenüng amshia ashishitsü o ya zülutsü.

Assam Assembly nung

tetsür MLA 8 lir, BJP nungi 2, Congress nungi 3, Bodoland People's Front (BPF) nungi 2 aser AGP nungi ka lir.

Küm asem tsüngta nung DySP Anjan Bora asoshi iba amala ken o ya tanaben buba adaloker lir. Social media nung pai tamalena iba ama ashishitsü o zülutsüba ajanga pa khen asoshi mapa nungi anendakja liasü.

"State BJP ajanga DySP anema ken o benokogo aser pa nem tapet temerenshi agütsütsüla," ta Assam BJP tir, Ranjeet Kumar Dass-ia ashi.



## MERANGKONG MOATSÜ 2017

TAYONGER: MERANGKONG MEDEMSANGER PUTU

Anogo : 3rd May, 2017

Mapang : 10:00 Ako

Tesentepdak : Amonglenden

Tongti tesemdanger : **Wb. Imkong L. Imchen**  
Hon'ble Minister,  
Environment, Forest &  
Climate Change, Nagaland

Tetushi Tejaoker : **Wb. Amenba Yaden**  
Hon'ble Parliamentary Secretary,  
Industries & Commerce, Nagaland.

### COMPERES

(a) Toshimenla N. Yaden

(b) T.Nüngsang Jamir

### Sentong Tarensen

1. Temoatsü meshia sarasademtsü : Pastor  
Merangkong Baptist Arogo
2. Tarur pela-a agizükba : Kümsangchiba, Putu Secretary
3. Sangro : Tinumar
4. Tepela O : Chariman  
Kangtsüng Village Council
5. Tsüngsang Ken : Watsü Telen  
Merangkong Town
6. Tetushi Tejaoker O :
7. Ken Ka : Merangkong Medemsanger  
Putu Tatar
8. Tongti Tesemdanger O :
9. Moatsümong (a) Merangkong Yar Tsüngkang  
(b) Kangching Culutral Troupe.  
(Ancha)  
(c) Enasüba Enarola  
(d) Hau  
(e) Hangpangtu aser Tsüngrem  
meinba

### - Moatsü Chiyongtsü -

Sensosanger ajak iba benjong nung arua  
shilem agütsü jaoker.

Anük apang ajak iba benjong moaja aser akhüm  
ketdakja arua adentsü pelashishia jaoker.  
Ajaki iba sentong asoshi sarasadema atadi.

## TSÜREMMEN YIM MOATSÜMONG SENTONG

Anogo : 1st May 2017

Mapang : 11:00 AM

Tesentepdak : Community Hall

Tongti Tensendanger : **Wb. Tamsü Jamir**  
Joint Director, Food & Civil Supply,  
Govt. of Nagaland

Sentong lenir : **Sp. Watitemjen,**  
Teacher, GMS, Tsüremmen

1. Sarasademtsü : Wb. B. Atoba, Pastor TBC
2. Pela agizükba : Wb. K. Bendang Imchen,  
Chairman, TVC
3. Moatsü ratet : Wb. L. Imnük Longchar
4. Tetsü-tebu ken : Olangoin  
I/c Wb. B. Imli & T. Panger
5. Tepela o 1. Wb. S. Meren Ao, Deputy  
Manager (Project)  
NHHDC Ltd. Dimapur (7 Mins)  
2. Wb. N. Nüngsang Longkumer,  
Rtd. Teacher (7 Mins)
6. Cultural dance 1. Mogrigaon Youth Assam  
2. Akumen Village Arju
7. Naklu ken : I/c Watsü President
8. Tongti tesemdanger o :
9. Tatem sarasadem : Wt. M. Asola,  
Associate Pastor Women.





## TIR YIMYIM YIMOBILEM (EDITORIAL)

DIMAPUR FRIDAY, APRIL 28, 2017

### Saru agütsüba timtem

**Y**ashi Nagaland nung adokba osangkaketem ajak nung National Investigation Agency (NIA) purtemi Nagaland government nung ketdangser asem apuba osang liasü. Par asem jagi NSCN-K purtem nem government sen agütsüba puteta parnokji apu ta angazükogo. Ibaji shitak alitsüa akok saka Nagaland nung Naga nunger linük tenzükertem nem Nagaland government nung inyakertemi saru agütsüba jagi osang tasen ka masü aser mimshia inyakba mapa kata masü. Nagaland nung government tenzükertemi ajuruba timtem tulutibaji Naga nunger linük tenzükertem telok pongo trok ka nem küm shia mesüra mapa shia saru sarua agütsüsbaji lir. Aji oda, khuret tulu asünungji taküm nungibo NSCN-IM telokibo government tenzükertem dang nungi saru kanga ajemer agitsü osang sangdongba taoba hopta nungang asenoki nguogo. Iba ama saru sarua agütsüba mapa nung department shia mesüra office shia nung tekolaktembang kanga shisabolua alitsü. Aji oda, yashi NIA teloki apur ketdangsertemji tia majung pushi dang ashi, linük tenzükertem nem sarubo government ketdangser aser mapa inyaker ajaki agütsüdagi. Aji oda, ita sen nung dang masü saka government-i inyakba mapa ajak nung shilem tilakabo linük tenzükertem nem agütsür, iba jagi Nagaland nung mapa junga inyaknüaka meinyaktetter. Tanü Nagaland mainba aser merenloktetbaji yimsüsür aser ketdangsertem ochimashi inyakba kija agibo masü saka saru sarur telok aika aliba ajanga timtem takoksa jenti ngudagi. Atangji, linük tenzükertem nem saru sarutsüba nunga ketdangsertem ochimashi mapa inyaka alitsüa akok. Iba timtem ya manendakstüet tashibo Nagaland renloknüaka merenloktettsü. Aji oda, Delhi nungi aruba sen ajunga agi state government tenzükertem o linük tenzükertem na nungdakang meperir asünungji, Nagaland atema terenlok mapa inyaktsübo sen manünger. Iba ama tensa tia ka nung Naga nunger longjemtsü kanga nungdak kümogo. Joko, küm aikabo yamai linük tenzükertem nem saru agüja Nagaland government tenzükertemia meinyaktettsü aser nübortemia maremtsü. Idangjibo, pi bendanger tsüngdang taaktsüka Naga nunger linük tenzükertem o Naga nunger nübortem na tsüngda rarateptsü. Iba ama tensa tia tamajungba kati asenok memenepdang asenok longjemtsüla aser yimten tebilemtsü ya koktettsüla. Tanü Naga nunger lanurtem asoshi tia majung kaji, Naga nunger yimten nüjiso asoshi raraba ajanga Naga nunger nüji aküm masü saka Naga nunger yiar amai kümer katap aser telok ka nungi ana, ana nungi pezü ta telokang teimba-teimba kuma lemsatetogo. Tanübo joko Naga nunger asoshi nüjiso angutsüba tebilemtsü masü saka Naga nunger yimten nüjiso bushirtem telok paika ya lemsar aliba ya ka kuma longjemtsüang tebilemtsü tuluba kümogo. Aji oda, Naga nunger tema aser telong nung alir ajak yimten nüjiso bushir masü saka alima rongsen bushirtem dang kuma omaogo. Naga nunger tarutsü putu asoshi jepaka nüktsü malu bilemba tebilemtsüji aji lir. Tanü linük tenzükertem saru sarubajia linük tenzükba mapa nung shitak amshir asü koma? Ano, government tenzükertemia linük saru tera agütsür tanungba jagi nübortem asoshi mapa shitak inyaker asü masü? Atangji, linük tenzükba mapaji nübortem saru magütsüiang metenzükettsü, anungji tetenzükdangyongi nübortem saru agidang Naga yimten nüchiso asoshi raraa aru. Aji oda, yimten nüchiso atema raraba tongpang nung tebok aser teka tazüng menokdaktettsü. Item ajakji nübortem angateta yariteptsüba jagi tim. Ajisüaka, tanü linük tenzükertem shitakba linük tenzükba mapa nung nokdaka ali asü (?) ta reprangdangtsüba jagi kanga nungdak kümogo. Alima yimten asoshi inyakertemi metettsüba kaji, yimten tenüng nung nübortem dang tashiyim agi saru sarua raraba tongpang jagi makoktsü aser nübortem dang tashiyim agi saru sarua akaba rongsenji kodanga senmang kuma maotsü. Alima yimten tongpang akoktsüba nok nü tajungtibaji tangatetba, anungji sarua tangatetba agi sarutsüla aser tagütsürtemia tangatetba agi agütsütsüla. Iba ama tangatettep nung inyakba ajanga dang asenok nüji akümtsü aser asenok nüji kümra, ibaji asenok asoshi nüjiso asütsü.

## OLEMSABANG

### NE O METENJANG MA, NAGALAND BJP

- Wapangrenba Imchen

April 26 Bodbar anogo Mokokchung BJP office nung par tongti zülur Longshi Kikon-i BJP state minority morcha yimlusü tenzüka jembidang, BJP telokji Khristiantem aser Khristian yimsü anemer telok ka ta tai tangatetba terataji aidoker linük terenlok asoshi dang alitsü ayongzük. Anosa pai ashi, BJP-i India temzüng kübok nüji temeten jenjang koba nisung shia nem agüja ali, ibaji akümtsüba aser wazüka yur dang inyaksangshir. India lima BJP sorkar kübok tatalokbatem aser bangzüng balala renema inyakba repranga Nagaland nung BJP ketdangpuri jembibaji An-i scü chir tebang shidok ama repranger aser angar, kechiba süra kulitem jenti agi par o aser inyaksangshi memetentsür. Saka O agi bangzüng azünger aser aji mapa agi inyaktet nungang iba bangzüngji renemer aser shiri iba bangzüng renem par lokti aser takumji metener asünung, kechi Nagaland BJP-i jembir, amanger aji pari liteta nübur dang sayutetsü.

BJP teloki Indian temzüng kübok nisung shia juri temetenji wazükja yua aser akümtsüba awashir ta jembir saka nisung dang nungi nashi nemang akhum tuluba agüja, nisungbo yiruyunga kecha masü nashibo kumzüktsüla ta mapai sayur. April 24 anogo nungang ano supreme court nung nashi shia nem adhaar mesükba nashi nema Unique Identification Number agütsütsü terenemba agitsü BJP sorkari zülü, iba ya samesa sayatenyatsü tangatetba aser mapa. India lima nashi metepsetsü aser nashi shi machitsü shiri aibelener temerenshi angutsü ozüng agütsür. Kar badaki aor aser kar tasütsü temerenshia angur. Tawaang Assam Karimganj district nung nisung ana nashi tepsetba agi police-i apu aser ano auer tonglokja merenshi. Nisung ka juri temetenji taküm alitsüba aser chiyunga jemerang taküm kaji alir. Nashi metsüa iba nungi nisung ka taküm alitsü asoshi tajangzük agia aliba ya meimchir sobaliba aser libaliro nung kum meyirijang aikasa. Saka BJP sorkar ozüng yagi nisunger luyim ka ajioda taküm alitsü temeten ka aidoktsür. Shiruru tim mesüi nisung südoksünemtsü asoshi kangshiba (tatishitsü agi, taküm dang tekup asaba, tetsüng leptoktsüba etc.) atemabo nokdakang kechiaser teyanglubatem madak kibur süa ano anepalutsüji nisunger temeten saka shiruru meji nisung ka takum alitsü temeden ajemrepba ya tai.

Government mapa inyakdak aser school-tem nung yoga agidaktsür. Ozüng agi masü tabo ashir saka tesayuri aser temaba menden nungi ozüng süa ashirji iba ya tashiyim mapa aser nisung ka temeden anema inyaker. Prof. Sundra Singh kaket 'Yoga an introduction' nung zulu, Hindu nunger kaket ajanga ashiba agi, yoga ya par tsüngrem shiva ajanga tenzük aser iba ya India nunger akhi tejen yimsoshiba mapang küm 5000 tema Vedic mapang nungi par tekülemba yimya nung bentshia aru. Khristan ka asoshi telumiba mesüka yogaji shidakba agi Hindu nungeri 'Om' ta asa-a sarasademba aser tanela azüokba yimya ka. Kodang iba yoga ya yimersen(compulsory) süa lim nung benoker nisung ka temeten anema aser Indian temzüng anema BJP-i inyaker.

Indian temzüng Arla 25 nung nisung kati tamangba yimsü pei temeten süa bentshitsu aser amangtsü shia lir saka 'ghar wapsi' sentong koba ajanga India nunger ajak hindu dangi meyipdaksütsü sentonger iba ya tai aser BJP teloki benloker. Tamang yimsüji prangpong aser nok aser ozüng kübok tashiyim agi kangshia bentshidaksütsü tamakoktsü, kechiaser iba ya nisung ka juri taküm nung tajangshiba aser tanela tejembiba ajanga lir. Maneni BJP teloki Khristian yimsü benjong tem apir sorkar mapadong balala ayonger. Khristmas benjongdi anogo nung Good Governance day amongtsü sorkari latet, Digital Indian Week ano passion week mapang amongtsü lateter, kechiba Khristantem tekülem sentong raksatsütsü aibendang sentonger? Tebilemdangtsü ka.

Meimchir lokti tentet ka teinyaktsüji raren(identity) wazüka ayutsü, ajioda semchisemnur asoshia iba raren ajang temeden kadaktsütsü inyaka aruba süiren jagi metentsür. Na/ni tanü BJP telok nung kechi tangatetba aser nukjidong nung aden aser adentsü lemteter lanlia asü mesüra aiatai bentsütsü teshisadangtsü ka. BJP state minority morcha yimlusü sentong Mokokchung nung semzükdang nür telok metenja jembibago süra ner mapa agi ajioda metenjangma. Aor-i Khrista Edward Winter Clark ajanga ajuru aser Naga kin balalai Aor ajanga Khrista ajuru süra Tsüngremi Aor samanir süa maongka agüja shimtetba rarenji koba tashika wazükttet? Aser Tsüngremi kechiba Aor nem iba maongka agütsü ta pela-a bilemer aser ano khuret süa bilemdanger. Jungkai Adok 2:4, "Saka ne mezüng temeim nai toktsü nung na anema ni ya kar." India lima temeyoktep sobaliba nung asen tia kar maka par dang nungi shilu balaka sürnung tensemji politically correctness-ji aser tangar den yimjung nung alitsüjia angazükdi saka asen Aori Khrista koba tashi ka agizükttet aser tarutsü lanu putu nem tanü mapa agi asüng kechi sempetsütsü, kanga shisadanga meratem agidi.

**Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir**

## TENÜK-TELEN TABENSA TAKÜM KAJI KODA JANGRATENTSÜ LIR.

- R. Imkong Lkr., 4th Mile, Diphupar

(Yashi adok nungi...)

Reprangang, mokokminertem rongnung tenük-telen mabensa purtem tongtipangsa nüpkokertem, tsüngtsükertem asen kidangi meshi-metsüa arudang karibo aridoker, kari o tamajung aika ashir aser artsür kidang nungi meinzüka yoker. Aser ano karibo ashir, hai nüpkokba, nüpkokla aser tsüngtsükba tesempatsü nisung tangsa ozü kilem 'compound' nungi oadokang ta shia aridoker. Yamaji parnok tu par kilem doktsür aodang yamai shia aor, Oh! Na koda tesüngmangtsü nisung, ner kidang nungi temoatsütem samadokang ta nennema shia oadoker. Shibai metet, item rongnung tu kabo kotak tenyar asütsüa shibaibo shitet? Anungji asenok ajaki ya metet-tsüla, kodangsa ner-kidang mesüra ozü kidangi meshi metsürtem arudir nai nü sasa meshi-metsür-tem tu komala nisungar tendangang aser parnok teka tazüngbo meyoktsüla, saka nü ket nung kecha melira, oda o tajung ka shir yoktsüla. Yamai ashitsüla, hai tembar tajung, tanübo kü ket nung kecha mali-ji tanga mapang ka nung arung aser asüng yanü-bo ni langka ka agibo yaritsü ta shir yokra parnok ni o tajungji parnok mulung nung rizünga ayutsü aser pelaseta ner ki doktsütsü. Saka kari kanga ngasangadema tamagitsü o shir, arütsür yokra, item meshi metsürtem jashiba takoji nai agiadoktsü ta metetangma.

Tang temalen shiyonga aruba ajak tu mata mabensartem aser tia makartem indang kar rasaa shiogo, aser tazüngertemi angajemer alitsü ta amanger.

Aser ano tobur junga anema aliba ajak ya Tsüngremer sendongtem lir ta rajemdaktsüner.

Yangi tatishitsü kar rajema angatet-tsü mechi nung tongmelang agi yamai agütsür. asenok junga alirtem rongnung kar balaka ola-tsüla ajungba den, ano o jembidang kanga rajema jembitet-ter aser iba den tsüngru-songa jembir. Aser ano karbo education degree tulu akaba den tobur tajung, aso-ajen tajung, jakten-kuten kanga sütep-sütepa alir. Saka nisung karbo soro-bangro majungba den mit-mepong tamajung alir. Nisung karbo tsüngtsüklongtsük, nüpkoktsüpok, matamalem alir. Item ajak ya bilemdangyonga aser asadangyonga ora ibaia Tsüngremer sendongsa lir ta rajema arur. Aser ano ya junga angaa liang, ni yangi asenok ajaki angatet-tsüsa olen ka shiner. Kodangsa junga anema alirtemi, mejungi alirtemi oda mata-mabensartem kanga mesenmetua, mezüngmeshia beshidir, item chir-nurtem mesüra semchi-semnurtem rongnung kar tepangeri kanga mezüngmeshitsüsa soteta atar aser soro-bangro, ola-tsüla nung junga liaka, kar auer ashikülak (Thieves) soteta kin kidong ajak menentsüsa mapangi bener arutsür. Anungji iba ama nisung tamajung sotetbaji Tsüngrem nungi atakatem anguba nisungtem lir ta pei sasarajemtsüla. Aser ano parnok kibongtem nungji kecha mataloka ka, tatem nung item takümttemji kecha mejungi tembangba angutsü, mesüra kar dakbo tashidak tapu balala agi shiranga takümttemji tembangba angutsü aser ano kar dakbo tangar dak matalokdangba mai-kui-tsü kar ataloka takümttem tembangba angutsü. Aser ano tanaben ashir, nisung karbo pei taküm junga alidang tali ngasangadema pei sünütsü süa, inyaka aliba purtem dak tama ataloktsü ataloker. Aser item amala timtem aser tashidak tamajungtem yabo alima Doctor temi aneptsütsü makoker. Aser pa/la taküm junga alidang bendenba ali rongsentem ajak temadoker külenang, ano kinungertem anema alirtem tu ajak telungi mekashishia ludaktsür kelenang tatem nung pa/la taküm tu tembanger, koda tesasatsü iba tatalokba ya angudang taküm anünga alirtem tu aika tansütsü otsü amai akümer, aser aika iba tatalokba ya angudang takümttem liba-liro-nung melenshia akümba angur. Koda tepelatsü osang tajung lir, Tsüngrem tenüng sangdi arungma. Asen Tsüngrem ya temeim taochi agi sünga aliba Tsüngrem lir, pai tatsü talang aser kechi komala aser shibaji kechi ajak metetjema lir. Saka asen Tsüngrem ya ano tenükmiba Tsüngrem asü nung pai kar ludaktsür aser kar temabai ajungket-tsür. Anungji asenok ajaki ya angatetdi arungma, Tsüngrem akhüm tsübuang aser pai ajak timi yanglutsütsü aser asenoki tang Pa bushitsü mulungra, pai asenok yongyaseta atatagi.

Asenok meimchir ka dak tenük-telen abensaa tobur junga aliba ya koda jangratemtsüka lir, saka ibai mapang ya tatsüka asoshi tang lir, iba sülenjibo kechiang ataloktsüar aseni memetet. Anungji asenok ajaki ya meteta alitsü tenüngdaktsü lir, ajiang asen meimchir rongnung karbo tesüngmangtsüka tushitsüsa tobur junga alir, oda parnokji tsüngden-kuden sütep-sütepa khen yongi tajitet-tsü maket den Education tulu akaba, item ajak ya pai/lai aginüba mesüra mulungba agi masü, saka Tsüngremer sendong nükjidong ka lir ta angatettsüla, aser iba ama peria, abensaa, sütep-sütepa aliba taküm ka dangji English oshi agi "perfect" ta ajatsü akok. Saka tatishitsü agi nisung kaji tereprangtsü nung ajak abensaa, peria tobur junga liaka pa mesüra la dakji jakla-liro tamajung mazüoktetba kar lira, oda ashitsü agi mit-mepong tamajung aketba, tebilemdang khen agi maliba taküm ka süra tatem nung takoksa tulu ajurutsü ana nung lir ta metetangma. Yamala nübu ka dangji tabensa nisung ta ajatsü makok, saka pa mesüra la-ji "mentally Handi-capped" tekolok tera meshidak ta ajatsü temsüa lir. Aser item amala nisungtem dangji tekolok shisatsü nung mabensa taküm ta ajatsü akok, mesüra pa/la ya aso-ajen tang ajung-ashi shilong tulu ka mali ta tanü-asüng lanurtemi jembibasa angashir, aser tanga o-sü ka nung tenüktelen mabensaba denji saku akümer.

(Maneni taruba adok nung...)

## ANO GO ABEN TSÜNGREM DEN

### NOKLANG MADAK KIBUR TAMANG

"Kibuba, Na tim tetem, kechiaser Na kü kilempoki aittsü kü dak Malang, mesüra ni Ne dangi arutsü Malang ta ni bilemer: saka o-ji dang shiang aser kü kilirji anepadoktsii"

- Lk.7:6,7

Yangi noklang madak kibur tamang aser mapa ya asenok asoshia lesson tulu lir. Pa tamangji koda ibaji mapa jagi sayur. Iba ama tular takar ka, kilir tila ka asoshi anepaluba koda timtem agi yangi angur. Asenok ka asünunga asenoki koda süla. Saka paibo tilatibaji ni ama taküm ka ta shia bilemetsüba angur. Iba yagi sayur takar, tular süaka ajak den kasa litetba, meimtepba, lemsatetba, küli sütetba taküm. Noklang madak kibur tamang ngua Yisui ashi, "Ni nenok dang züngpong shidi, Iba ama tamang tulu Israel rongnung Ni kecha nunga monguka" "Mathi 8: 10. Noklang madak kiburi ashi, Nai O dang shiok nung kü kilir aneptsü. Kechiaser kü kilempoki Na aittsü ni metemsü." Yisui pa dang langzü, "Kidangi oang, nai amangba ama aji na asoshi inyaktü" aser kilirji anepadok. Mathi8:13.

Tanü asenok noklang madak kibuba mesuka kibur ka ka lir. Asen kibong nung teyaritepertem, adianu chirtem, tsürapurtem aser anatsülen in-laws tsütsü koda aseni temeim mapa lemsateper aser yariteper. Asenok ajaki khen meyipa shisadangi aser noklang madak kibursang tamang, mapa, külisüba den medemdanga asen mapa külisüba shisadangi.

### SARASADEM

Kibuba, anogo shia kü tamang külisüba tabensaba akümtsü ni yariang ta mepishir. Amen.

## Homosexuality ji temenen ta ashir amangbapur ka okadak nokdaktsü



**Laishiba nung homosexuality anema shia aliba tuteta ashiba ajanga University of Sheffield nungi aridoksang, Felix Ngole iba noksa nung angur.**

**April 27, 2017** : Laishiba nung 'homosexuality' ji temenen ta shia aliba, tuteta ashiasang, Felix Ngole University of Sheffield nungi aridoka liasü.

Khrista dak amanger tesayur aser social work nung Masters degree tagidak alisang, Felix Ngole-i Facebook ajanga tetsür o tetsür na aser tebur o tebur na kibong akümba aitsüba agi pa aridokba University anema pai okadak ken o ka benoka lir.

Cameroon nung tanur pezü tebu, arishi küm 38 tain, Felix Ngole dang 2016 küm University of Sheffield-i par college toktsütsü ashi. Iba mapang pa iba university nung social work nung Masters kümmabuba tagidak liasü.

University nung inyaktertemi ashiba agi Ngole ya Kim Davis pusemer asütsü akok. Kim ya Kentucky nung clerk ka liasü aser pai tetsür o tetsür na aser tebur o tebur na kibong akümba indang kuli kaket sa magütsü.

Ngole-i 2015 September ita Levi (Leviticus) kaket nung ajemdaker tetsür o tetsür na aser tebur o tebur na kibong akümbaji temenen ta Facebook nung par friends temi dang angutsüsa post asü.

University nung inyaktertem

senden ka amenba sülen pa 'professional qualification' tarensen nungi agien aser joko university nung kaketshir ka ama mezüngshitsü ta metetdaktsü.

Pai tetsür o tetsür na aser tebur o tebur na kibong akümba aitsüba ajanga pa azüngba subject, 'social work' nung timtem alutsü, ta committee-i ashi.

Ajisüaka tang Ngole-i pa aitsürtem anema ken o benoktsü temeden nguogo, ta osangbenertemi ashi.

Deputy High Court Judge, James Lewis-i university-i agiba telemtebaji tim masü asütsü akok ta shia Ngole dang iba ken o London High Court nung benoktsü temelaba agütsü. Anungji tang nungi Ngole-i pa aitsüba anema temeden bushitettsü aser memunui obendang tajung angutsü imlar.

Ngole benokba ken o ya Khristan Legal Centre-ia nungiter.

Khristan Legal Centre nung chief executive, Andrea Williams-i: 'University-i meimchir temeden anema inyakogo. Parnoki 'freedom of speech' aser 'freedom of religion' wazüka meyutet," ta ashi.



**OLONG PAITEP # 4405**

1		2				3	4		5	
					6					
		7								
								8		
	9									
10										11
			12		13					
			14							
15						16				

<b>TIPILEN</b>		<b>LANGTSÜNGLEN</b>	
1. Nok agi shi alep - (5)		1. Peria - (5)	
3. Yong agi atakba lempak - (5)		2. Tai inyak - (7)	
7. Aoksa reprang - (6)		4. Teptsü - (4)	
8. Te _ _ _ et - (3)		5. Kotak _ _ _ _ _ - (6)	
9. Ajuruner - (9)		6. Asa _ _ _ ang - (3)	
10. Pentok lu - (3)		8. Taruba küm - (7)	
14. Lendong nungi jenbu - (6)		9. Yangi amener - (6)	
15. Temang junga aliba - (5)		11. Kibong yongsük - (5)	
16. Lokti menjendi - (5)		12. Kümsetta ao - (4)	
		13. Mesük - (3)	

**OLONG PAITEP # 4404 TELANGZÜBA**

<b>TIPILEN :</b>		<b>LANGTSÜNGLEN :</b>	
3. Alizüng, 5. Jahaz, 6. Obang,		1. Ojang, 2. Shilem, 4. Zübu, 7. Nao,	
8. Liku, 9. Medemer, 14. Wain,		10. Renlok, 11. Tai, 12. Molok,	
16. Yimra, 17. Arogo, 18. Osemlok.		13. Arem, 15. Alak.	

**ALOKBA DOCTOR NEM TENARONG REPRANGDAKTSÜR :**

Oh!!!! Doctorba!!!!  
 Doctorba!!!!..... yamaji na?? joko ni pension alurji yamala mapabo meinyaker aser Joko ni Arogo nung züngsem tajung ka kümadoker. Anungji yamaji kodanga masütsüla...

Alok, ne tenarong nung kecha timtem mali, saka nai office nung ochi mashi sen tali amuzüka kiojen, gari aser japujari nung sen tali indokba ajanga Tsüngremi tenarong tajak kümdaktsü südi no!!!!

**TANÜBO NAI LANGZÜANG**

Q. Alima nung koba linüki Liquefied Petroleum Gas (LPG) ya tanga linük dangi tiemba ayoker ?

- [A] China      [B] India      [C] Japan      [D] Bhutan

(Taruba adok nung onoki langzüksü)

**YASHIADOK TELANGZÜBA :** Kasinadhuni Viswanath

**Tepela Tasoba Anogo**



Tanur asoba anogo nung salem osang den noksa angari adokdaksunüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela: e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

**NAIA YA METETER MA**

**KASINADHUNI VISWANATH**

India nung Bollywood nung takotet arishi küm 87 tain actor aser director Kasinadhuni Viswanath nem '2016 Dada Saheb Phalke' sempet agütsütsü shimtetogo. Iba sempet ya May 3, 2017 nü India Tir, Pranab Mukherjee-i Vigyan Bhawan, New Delhi nung agütsütsü. India Cinema kübok iba sempet angur rongnung Viswanath ya 48buba asütsü aser kasa sempet den senpet sen lakh 10 agizüksü. Kasinadhuni Viswanath, ya February 19, 1930 küm aso.



Tamasabao pa audiographer ka ama inyaka liasü, saka lialia director, screenwriter, aser actor mapa ajak Telugu, Tamil, Hindi cinema, aser Television nung shilem agia liasü. Pai tang tashi nung National Film Awards pungo, State Nandi Awards terok, Filmfare Awards South aser Filmfare Awards ter ta agizüka lir. Pa küm 60 tashi Film mapa inyangdang feature films tapu balala 53 nung direct süa yanglu.

**SUDOKU # 3518**

**TELANGZÜBA # 3517**

			3			1			7	8	4	2	1	9	6	3	5
6	7	1				2		5	2	9	3	6	7	5	8	1	4
					2				6	1	5	3	8	4	9	7	2
2	8	3	7	6	4		1		8	2	1	7	5	6	3	4	9
4	6	7		9			2	3	9	3	6	1	4	2	5	8	7
		5	8	2		4	7	6	5	4	7	8	9	3	2	6	1
	9	2	4				5		4	6	8	9	2	7	1	5	3
	1			3		9		7	3	7	2	5	6	1	4	9	8
5	3	4			9		8		1	5	9	4	3	8	7	2	6

**OJANG LUTEP # 4010**

- ONGJTELEM : □□□□□□□□□□
- AKMAI : □□□□□
- EPI : □□□
- EIP : □□□
- SESAP : □□□□□
- NNUG : □□□□
- NGDA : □□□□
- IKRNYAA : □□□□□□□□
- TOKAK : □□□□□
- GUTSMANÜ : □□□□□□□□□□

**OJANG LUTEP TELANGZÜBA # 4009**

TELONGJEM MAKAI PEI PEI SASEP NUNG DANG INYAKRA TAKOK MANGÜTSÜ

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):

- 

**Aries**  
21/3-19/4

Tanü nisung aika mapa nung temolung magütsüteti alitsü. Saka nai tangar den sensaksema mapang meindokra nü mapa nung takok angutsü.
- 

**Taurus**  
20/4-20/5

Tanü nai ki shibanger kilong nung süngjema alitsü bilemang. Na meketa aliba nisungtemi nü den o tali jembinütsü. Nüngdak maliba o mejembi tajungba asütsü.
- 

**Gemini**  
21/5-20/6

Tanü nai o mejembi maremtsü südi. Anungji nai senden kar ayongzük ang mesüra medemertem aser kinungertem den sensaksem liang.
- 

**Cancer**  
21/6-22/7

Tanü nai mapa nung temolung agütsütsü bilemang. Saka azünga aliba mapang medemertem den sensaksem liang aser külemi chiyongtsü sentong renemang.
- 

**Leo**  
23/7-22/8

Tanü nai tangar indang mapang agütsütsü mebilemang. Lokdi aser mapa nung tangar lia o jembiba nung mapang kümdanga amshiang.
- 

**Virgo**  
23/8-22/9

Nai aiben tangar den sensaksem mesünüi bilema alitsü. Saka tanübo nai medemertem den mapang indoka otsü-olem lemsatepang.
- 

**Libra**  
23/9-22/10

Tanü nai tangar den o tali jembira iba ajanga rarapangsen kar adokdaksütsü südi. Anungji nü mapa nung dang temolung agütsü tajungba asütsü.
- 

**Scorpio**  
23/10-21/11

Tanü jembishinü aika nai ajurutsü, anungji mangatetep madoktsüsa kümdanga liang. Nü mera tajungtiba nung jajang aser tangar temolung teyirutsü.
- 

**Sagittarius**  
22/11-21/12

Tangar akhüm tsübuba ajanga na tajangzü angutsü ta nai bilemang. Tajangzük aliba sentong nung nai shilem agütsü merangang.
- 

**Capricorn**  
22/12-19/1

Nü mapa nung shilem agir tali asüba ajanga na satema meinyaktetsü amai bilemang. Saka nai parnok den sensaksem lia nü mapa inyakra jangratemtsü asütsü.
- 

**Aquarius**  
20/1-18/2

Tanü nai yimjung nung alitsü merangang aser nü tashi yari dang nokdakang. Ashishitep aliba onüktem aser nisung tai den jembira na lendongi aitsü.
- 

**Pisces**  
19/2-20/3

Tanü nai mapa inyakra nung temolung agütsütsü asoshi mebilemang. Saka senden kar nung shilem agiang, mesüra medenertem den sensaksem liang.

# Mongin Actor Vinod Khanna süogo



**New Delhi, April 27 (Agencies):** Veteran actor aser BJP MP, Vinod Khanna cancer agi mapang talangka shirangyar Brehostibarnü Arishi küm 70 nung süogo.

Bollywood nung nungtu film 'Amar Akbar Anthony' aser 'The Burning Train' nung shilem agisang actor ya tawa Mumbai nung Girgaon tesem nung aliba HN Reliance Foundation and Research Centre nung temang anepalua liasü.

"Veteran actor aser Member of Parliament Mr. Vinod Khanna shiba HN Reliance Foundation Hospital nung temang anepalua liasü, pa anepdang 11:20 ako nung 'bladder carcinoma' tashidak

Jurm nung lir.

Vinod Khanna film nung shilem agi tenzükbaji, 1968 küm 'Man Ka Meet' film nung shilem agia tenzük. Iba sülen pai award agika agizüka liasü. Award agizükba rongnung Haath ki Safaai film nung shilem atema Filmfare award nung supporting actor angu aser 1999 küm Filmfare Lifetime Achievement Award ngua liasü.

1982 küm guru Osho Rajneesh sülen anidaksüba atema pai film nung shilem agiba nungi khen atema anena liasü. Küm 5 sülen pa film industry-i meyipa arua nungtu film Insaaf aser Satyamev Jayate na nung shilem agia liasü.

Khanna-i 1997 küm yimden yimsüsübaren nung adena aser taruba küm Gurdaspur nung BJP nungi Lok Sabha election nung tokteba akok. Atal Bihari Vajpayee sorkar mapang 2002 küm pa Union minister for culture and tourism aküm. Iba sülen 2009 küm election nung tamakok angu saka 2014 küm Gurdaspur nungi maneni shimshi.

Pa asüba tetushi agüja Baahubali film yanglurtemi Brehostibar aonung film sayatsü aliba thiogo.

# Katrina Kaif-i instagram nung mezüngbuba noksa lemsatep

**April 27, 2017 (Agencies):** Actress Katrina Kaif photo-sharing platform Instagram nung Brehostibarnü denogo aser lai mezüngbuba noksa lemsatepa liasü. La iba app nung adenba sülen ghonda ka tsüngda nung la sülen anidaker meyrejang 235 aküm.

Lai instagram nung la tzüküm nung mener tangokba noksa ka lemsatepa aser yamai zülutsü, "Tetenzük tasen ka aser ni pelaa aliba tesem nungi #helloinstagram."

Katrina-i facebook nung la sülen anidakertem den la sabang tasen ka nung adentsüba lemsatepa liasü saka instagram nung adentsü ta



jangjaa meshi-i liasü. Aji saka la iba photo-sharing app nung Brehostibarnü nikongtsütsü 2 ako nung dena liasü.

**M a n e n i** Katrina-i Twitter nung adentsü asoshi sentong lir, saka lai Snapchat nung shilem agütsü asoshi tejangraba maliba osang ajanga metetdaksü.

Katrina taruba film Jagga Jasoos aser Tiger Zinda Hai nung Ranbir Kapoor aser Salman Khan den shilem agiba angutsü.



**Chandigar, April 27 : Brehostibarnü High fashion Yoga sentong nung UT Home Secretary, Anurag Agarwal, Rrave telok züngsemtemi naru jung bener Hotel Shivalikview nung agizükba noksa nung angur.**

**TAN HOPTA ATEMA - KOMA SÜLA ?**

**Q. Taruba election nungbo constituency shia nung political party aser Independent party shia Fund Raising Committee shima candidate yari nunga koma süla?**

-----

**Olong 20 shi nung April 28, 2017 tashi nung iba telangzüba ya onok dangi**

**e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.**



## 20-Megapixel Selfie Camera aketba Vivo V5s phone sayaogo

**April 27, 2017 (Agencies):** Vivo indang V5s smartphone Brehostibarnü sayaogo. Iba phone ya yaküm sayaba Vivo V5 yanglushir adokba phone ka lir.

V5, nungi V5s-i ajungketba sülen screen tasazük inch 5.5 dang lir saka phone tasenba ya full HD lir. Screen kümzüka ayutsü asoshi Corning Gorilla Glass dena 2.5D glass design inoksema yanglua lir.

Vivo V5s nung 1.5GHz Octa-core MediaTek MT6750 SoC aser RAM 4GB keta lir.

Maneni V5s nung Android 6.0 Marshmallow keta lir aser battery tashi ya 3,000mAh lir.

Vivo V5s nung selfie atema 'Moonlight' flash aser video calling atema 20-megapixel tejaklen camera inoksema yanglua lir. Tesülen aliba camera ya 13-megapixel aser iba nung PDAF aser LED flash keta lir.

Iba smartphone nung 'inbuilt storage' 64GB lir aser 'hybrid microSD card' ajanga maneni memory 256GB tashi inoka amshitetsü.

Vivo V5s ya online nung sen 18,990 agi angutsü.

Phone sentsü 'Crown Gold' aser 'Matte Black' nung angutsü.

Phone nung 'connectivity' tsütsü repringdangra; 4G LTE, WiFi (802.11 b/g/n), Bluetooth 4.0, GPS/GLONASS, OTG, microUSB port ka, Accelerometer, Light sensor Digital compass aser Smart Split 2.0 keta lir.

Phone talinürtem asoshi tanü nungi jelia mekaa yutetsü aser May 6 nü nungi tenzüka iba phone ayoktsü.

## WhatsApp amshia shishilembaba nung India-i shilem tulu agitsü

**New Delhi, April 27 (Agencies):** Nüburtemi WhatsApp amshia shishilembatsü asoshi tang sentong tasen ka yangluba mapang lir aser iba sentong nung India-i shilem tulu agitsü, ta iba company ajanga osang ka sangdong.

WhatsApp ya Facebook meyong lir aser iba sapang ajanga nüburtemi shishilembaba, bank aser airline tem den tongtepratep sütetsü asoshi sentong ka kobi melie tendangtsü, ta taoba küm iba company ajanga sangdonga lir.

"...onok iba sentong asameyangba mapang ka lir aser ka khen ka ta sentong balalatem tenzüksü. Taküm küm süyitema aodang WhatsApp ajanga shishilembaba tila aser tulu ajunga nung kongshia aoba angutsü. Aser iba sapang nung India-i shilem tulu agitsü," ta WhatsApp indang odongtar, Matt Steinfeld-i ashi.

WhatsApp amshir ya India

nung tuluba lir. Iba App amshir alima nung billion 1 dak tema lir aser item rongnungi India nung iba sapang amshir million 200-shi lir. India nung WhatsApp ya Hike aser SnapChat den kasa tokteper.

Facebook nunga kasa shishilembaba sapang lapoktsü nükitong lir. Alima ajunga nungi shishilembar telok million 5-shi ajanga Facebook nung parnok sentongtem sayur.

WhatsApp amshir tali buatsü asoshi company ajanga sentong balala bendenloka arutagi. WhatsApp amshirtemi pei bilembatem noksa aser 'animation' amshia lemsateptsü asoshi sentong tenzüka lir.

Shidisen mamshie senotsü tsütateptsü asoshi WhatsApp-i sentong ka renemba mapang lir aser iba sentong ya mezüng India nung tendangtsü. Iba sentong takok ngua amshitetsü asoshi company-i shidisen masü saka digital ajanga senotsü tsütateper telok aser company tem bushiba mapang lir.

India nung digital amshia shishilembatsü nükitong aliba nung teyari agütsütsü asoshi WhatsApp co-founder, Brain Acton aser IT Minister, Ravi Shankar Prasad-na February ita ajuruteba sensaksem kaogo.

"India tesem ajunga nung WhatsApp amshirtemi 'feedback' agütsüba onoki kanga züngzünga repringer aser tajungtiba küma yanglushitsü meranger. Onok asoshi India ya linük tulutiba aser shishilembatsü asoshi tesem tongtipangba lir," ta Steinfeld-isa ashi.

Digital India nung yaritsü asoshi company ajanga iba sentong angatetsü meranger, ta paisa shisem.

Sorkari taoba küm November ita nungi shidisen 500 aser 1,000 tejenba nokdangba sülen India nung 'digital transaction' nung kanga renloka odagi aser item rongnung credit aser debit card, mobile banking, m-wallet aser UPI tem lir.

## China nung 'drone' ajanga tayimtsü nem timtem agütsür

**Beijing, April 27 (Agencies):** China nung tayimtsü anendak 'drone' ajanga tayimtsü nem timtem agütsüba ajanga iba 'drone' yangluba company, DJI-i iba 'drone' aliba osang agütsür nem sen £112,000 agütsütsü sangdongogo.

April ita 14, 17 aser 21 nung 'drone'-i tayimtsü nem timtem agütsüba ajanga Chengdu Shuangliu International airport nung passenger aika mapang shidak nung maposuteti atadaksü.

Item 'drone' tem ajanga April 21 kisüng nunga tayimtsü 60 nem timtem agütsü, ta osang ajanga ashi.

"Item tatalokbatem ajanga 'drone' anüng nung yimzudaktsüba agi nüburtem kemzüka mali ta sayur," ta mongin kati ashi.

Mezüngbo tayimtsü anemba tesem anasa nisung memeni anüng nung senzüba tayimtsü tila, 'drone' aliba osang ketdangsertem nem metetdaksüra sen £1,124

sempt agütsütsü asoshi 'local public security bureau' ajanga osang sangdonga liasü.

Saka tangbo iba osang agütsüra sen timba agütsütsü asoshi DJI ajanga sangdonga lir.

"Item 'drone' ya tayimtsü anemba tesemtem anasa senzudaktsüba ajanga nüburtem nem lendong agütsütsü ana nung lir aser Unmanned Aerial Vehicle (UAV) tenüng menüksür," ta DJI ajanga ashi.

"Drone yangluba nung DJI company ya temaba jenjang nung lir aser tawa atalokba ajanga parnok tenüng menentsür. Iba yongji osang agütsür nem sen agütsütsü ya company ajanga sangdong sudi," ta University of Birmingham nung Prof David Dunn-i ashi.

"Drone jajatsü asoshi tesem tasazük yuja lir aser iba tesem nung senzütsü asoshi software, geofencing, ya DJI company ajanga amshiba yagi aiben mapa shidak meinyakteter," ta Prof Dunn-isa ashi.



CHENNAI, APR 27 : Brehostibarnü Chennai nung arishi küm pezü tain, Harnikasri-i Universal Book of Records nung la tenüng zülüoktsü nükitong nung entsü aser bingana nung mener 'Padmasanam' agiba noksa nung angur.

## Guns N' Roses teloki 'Not In This Lifetime' tour nung sen million \$230 aazük



SCG Stadium, Bangkok nung 2017, February 28 nü kentener telok, Guns N' Roses-i kenten sentong atemdang tangokba noksa nung angur.(File photo)

**April, 27 2017 (Agencies):** Guns N' Roses kentener teloki 'Not In This Lifetime' tour ajanga tang tashi nung sen million \$230 aazükogo aser maneni iba kasa sentong taruba ita tenzüksü asoshi renemdar.

Tanaben kümshiba 'Sweet Child O Mine' ken yanglur telok nung Axl Rose, Duff McKagan aser Slash nung densema lir. Parnoki yaküm stadium 21 nung kentenba sentong 25 ayongzüka agi.

Billboard ajanga metetdaksüba agi, New Zealand aser Australia nung kentenba sentong kicha nung parnoki sen milliom 38

ajangzüka liasü.

2016 April ita nungi tenzüka kenten sentong ayongzüka akaba nung parnoki sen million \$230 ajangzükogo. North American kenten sentong nung parnok kentenba repringtsü asoshi ticket million ka dak tali ayokba nungi sen million \$116.8 ajangzüka liasü.

Billboard ajangasa ashiba agi, paronki tang tashi nung aazüka aliba sen ya Asia nung shishilembadak 7 nungi küm tetenzüklen aazükbabo densema mali.

Parnok taruba ita Europe nung Ireland, Slane Castle nungi tenzüka kenten sentong agiba

nung sen maneni aika aatsü imlar.

Ano parnok North America nung tanaben stadium 15 nungbosa kentenba sentong akatsü sentong lir.

Guns N' Roses telok nung maneni drummer Frank Ferrer, guitarist Richard Fortus, keyboardist Dizzy Reed aser keyboard atemer tanabuba, Melissa Reese densema lir.

Tawa sen aaba rongnung Guns N' Roses pur temaba jenjang nung lir. Iba list nung Def Leppard, Red Hot Chili Peppers, Twenty One Pilots, Santana aser Green Day nung densema lir.

## Instagram amshir million 700 kümogo

**April 27, 2017 (Agencies):** Küm ana tsüngda nung Facebook meyong 'video sharing app, Instagram' amshir million 700 dak tali kümogo. Taoba ita 4 tsüngda nung iba app nung nisung million 100 dena liasü.

"Alima ajunga nung Instagram amshir million 700 dak tali akümba osang sangdongtsü asoshi kanga janratema bilemer, aser tatembangsa iba app nung adener parnok million 100 ya taoba mapang dang nungi kanga agi tekeraba dena liasü," ta company-i parnok indang blog nung zülutsü.

"Onoki alima ajunga nungi nüburtem Instagram nung adentsü asoshi temelaba kümdaktsüogo. Iba ajanga parnoki tajangshiba aser tejangrabatem medemertem den lemsateptetsü," ta maneni zülusemstü.

Instagram amshir shilem ana agi timba kümogo.

Instagram nung nütsüng renlokba ya company ajanga medemertem den sendakteptsü asoshi leman tajungba agütsüba aser 'sign-up' asütsü asoshi temelaba kümdaktsüba ajanga lir.

"Features tasen 'Stories', 'Live Video' aser 'disappearing messages in Direct' amala ajanga nüburtemi parnok tebilemba aser jangrabatem tajungba lemsatepteter," ta parnokisa ashi.

Taoba hopta Facebook ajanga Artificial Intelligence (AI) ya tashitait hadir ka ta sangdong aser company ajanga Facebook, Instagram aser Messenger nung AI-infused camera yanglutsü asoshi senotsü indoktsü lemsateba liasü.





Warsaw, April 27, 2017: Brihostibarnü Poland yimtiba, Warsaw nung India tatong Tir, M. Hamid Ansari aser Poland Ato kilonser, Wt. Beata Szydlo na leniba nung senden amenba noksa nung angur. Kasa noksa nungsa Minister of State for Micro, Small & Medium Enterprises, Giriraj Singh aser Poland Agriculture & Rural Development Minister, Krzysztof Jurgiel nata angur.

## PM-i UDAN scheme kübok Shimla-Delhi tayimtsü tenzüksüogo

**Shimla, April 27 (Agencies):** Air-i Delhi-Shimla tayimtsüji tayimtsü tenzüksü. Brihostibarnü Himachal Pradesh yimtiba, Shimla nung ketdangsüa reprangtsü. Ato kilonser, Narendra Modi-i UDAN scheme kübok sen 2500 agi tayimtsü nung ghonda ka ainlen senzüba tayimtsü Shimla nungi tenzüksü, aser slipper asemertema (sensaker) tayimtsü nung amentsüji kü nükjidong lir, ta metetdaksü. "Ude Desh ka Aam Nagrik" (UDAN) scheme kübok mezüngbuba regional tayimtsüji Jubbarhatti nung Shimla nungi Delhi tashi tenzüksü. Jubbarhatti ya Shimla nungi kilometer 22 shi pilar lir. Minute 20 shi jembidang Modi-i, "Chappel asemertema ka tayimtsü nung amentsüji kü nükjidong lir," ta ashi. Air India subsidiary Alliance

Air-i Delhi-Shimla tayimtsüji tayimtsü tenzüksü. UDAN scheme kübok 19 nungi 78 tashi asütsü aser tayimtsü shia nung menden shilem 50 bo ghonda shia sen 2,500 asütsü. Iba atema shimba airline company temji Airline Allied Services (Alliance Air), SpiceJet, Turbo Megha Airways, Air Deccan aser Air Odisha lir. Iba scheme kübok tesem tezülen tayimtsü service agütsütsü aser kilometer 500 shi (ghonda ka) nung sen 2,500 asütsü, ta ministry of civil aviation-i sangdong ka nung metetdaksü. UDAN Scheme ya National Civil Aviation Policy (NCAP) shilem ka lir aser iba ya yaküm June 15 nü sayaa liasü.

## Jammu & Kashmir atema tetsür temeja sepai battalion ka shimtsü

**New Delhi, April 27 (Agencies):** Jammu & Kashmir nung longkak aita long amshirtem azüoktsü atema kobi melii tetsürtemi akumba India Reserve Battalion (IRB) shima mapa lemzüksütsü, ta tanü home ministry ketdangser kati metetdaksü. April 24, 2017 nü Jammu & Kashmir yimtiba, Srinagar yimti kübok Lal Chowk nung tetsür kaketshirtemi sepaitem den raraba tatalokba nung ajemdaker home ministry-i iba telemtetba

ya agir. Tetsür temeja battalion ji Centre-i Kashmir atema shimtsü aliba IRB Battalion pongu rongnung ka asütsü. Tetsür temeja battalion nem tensa azüokba mapa lemzüksüba dang masü saka longkak aiterem azüoktsü atemaa mapa lemzüksütsü, ta ketdangserisa ashi. IRB Battalion 5 atema tenüng agütsür candidate 1,40,000 liasü, aser item rongnung candidate 6,000 bo

tetsürtem liasü, ibayongji tetsür battalion-a ka shimtsü atema Home Ministry-i telemtetba agiogo. Tanü New Delhi nung Union Home Minister, Rajnath Singh leniba nung temaba jenjang nung senden ka amendang iba onüka süoka jembia liasü. IRB Battalion pongu shimtsü atema maparen tenzükogo aser tenüng agütsür shilem 40 bo Kashmir nungi lir. Tang linük nung India Reserve Battalion 144 lir.



Thiruvananthapuram (Kerala), April 27, 2017: Brihostibarnü Kerala yimtiba, Thiruvananthapuram nung aliba Assembly hall, Secretariat complex nung Kerala MLA tem Kerala Legislative Assembly tenzükür küm 60 ajungba anogomung nung tanü senden amenba noksa nung angur.

## Lokpal Act maparen anendaka ayuba ya tim masü: SC

**New Delhi, April 27 (Agencies):** Brihostibarnü Supreme Court (SC)-i, Lokpal and Lokayuktas Act 2013 ya inyaktetsü ozüing ka lir aser iba maparen anendaka ayuba ya tim masü, ta metetdaksü.

Iba Act kübok Lok Sabha nung Opposition lenirji Lokpal selection committee nung züingsemasütsüla, saka tang Lok Sabha nung Opposition lenir mali.

Tamalen Supreme Court tetuyuba ka lephsia Justice ana-Ranjan Gogoi aser Naveen Sinha nati akümba bench-i, "Asenoki inyaktetsü ozüing ka meinyaki ayur aser iba mapa anendaka ayutsüba ya tim masü," ta ashi.

Linük nung Lokpal shimtsü atema temepishibatem March 28 nü Supreme Court-i angadanga liasü.

NGO Common Cause atema jembitsür senior advocate,

Shanti Bhushan-i, 2013 küm Parliament nung Lokpal Bill agizükaka iba ya 2014 küm nungi ang mapa küma inyaker, aser sorkari asa-a Lokpal meshimer, ta ashi.

Attorney General (AG), Mukul Rohatgi-i, tang ama tensa nung Lokpal shimtsü makok, kechiyong iba Act kübok Lok Sabha nung Opposition lenir maliba dak sentakba nung ozüing yanglushitsü atema Parliament nung benoka lir, ta metetdaksü.

Yaküm November 23 nüa Court-i Centre dang, Lokpal tekaraba nung shimtsüla, iba ozüing ya tasü mekümdaksütsüla, ta shia liasü.

Lok Sabha nung opposition party tulutiba, Congress züingsem 45 dang lir aser opposition lenir asütsü atema party nung züingsemji menden Lok Sabha menden 545 nungi shilem 10 bo abensatsüla.



April 27, 2017 nü Poland yimtiba, Warsaw nung India tatong Tir, M. Hamid Ansari aser Poland Ato kilonser, Wt. Beata Szydlo na leniba nung linük ana senden amenba sülen Minister of State for Micro, Small & Medium Enterprises, Giriraj Singh aser Poland Agriculture & Rural Development Minsiter, Krzysztof Jurgiel nati aluyimba nung amalitepa inyaktetsü atema tezüngzükep agiba noksa nung angur.

## CRPF-i Maoists telungpur maneni mita aotsü

**New Delhi, Aopril 27 (Agencies):** Tawa Chhattisgarh, Sukma district nung Maoists telungpurtemi CRPF sepai 26 tepsetba sülen CRPF-i Bastar region nung telungpur anema maneni operation sashia aotsü telemtetba agiogo.

CRPF nung Acting Director General (DG), Sudeep Lakhtakia-i, telungpurtemi amakba ajanga item tesem nung Standard Operating Procedures (SOPs) reprangshitsü nungdak ta sayur, ta metetdaksü.

Pai ashiba agi, CRPF-i mera tasen kar agitsü aser item tesem nung terenlok alitsü atema gari lenmang maneni anüksü.

Osangbenertem den jembidang pai, "Onoki asalentong melenshitsü lemtetogo. Onoki tangazükba kar kaogo. Ni itemji tejangja ni melemsateptsü. Onoki

ozü sepai tali yoksemsü aser telungpur anema sashia mita aotsü," ta ashi. Sepai tesadang kati lenmang yangluba maparen nung security agütsüdang sepai tesadang kati telungpurtem mita aotsü, ta paisa metetdaksü.

CRPF director general-i Chhattisgarh nung sepai battalion 28 lemzükja lir, aser item rongnung battalion 10 dang Bastar region nung lemzükja lir, aser pai ashiba agi, Bastar region nung sepai tali yoksemsü.

Central Reserve Police Force (CRPF) battalion ka nung sepai 1,000 lir.

Tawa telungpurtemi amakba tatalokba bushisüngdangba ajanga CRPF sepai section pezüji metre 600-750 shi pilar liasü ta bushitet.



## Gulen pusemer Turkey police 9,000 shi mapa nungi anentsüogo



BURSA, APRIL 27, 2017: U.S.- nung aliba cleric Fethullah Gulen, pusemertem ta temulung melemi bilemertem Bursa, Turkey okadak tonga arudang police ketdangsertemi anir aoba noksa nung angur.

**Ankara, April 27 (Agencies)** : Gulen telok den tesendaktep aliba Turkey nung police 9,000 dak tali mapa nungi anentsüogo.

Bodhbarnü Turkey tesem balala nung police temi mita aiba mapang Gulen telok nung

züngsema lir ta temulung melemi bilemba nisungtem, parnok 1,000 ka dak tali pua lir, ta Interior Ministry sangdong nung shia lir.

Iba mita aoba mapa ya chief public prosecutor office-i tuyuba dak ajemdaker inyakba

lir, ta osangbenertemi metetdaksü.

US nung amenoka aliba Fethullah Gulen indang asalendong nung yaküm June ita nisung 249 tashi taküm samatsü, ta Turkey sorkari aija lir.

## US-i North Korea asetshidaksütsü meranger

**Washington, April 27 (Agencies)** : North Korea-i nuclear agi amaksü ta tsübutepa aliba mapang ka nung US-i South Korea nung 'missile defence system' ka anogo ishika tsüingda amenoktsü aser North Korea den rongsenkettsüng tsütsü kecha melemsatepi nokdangtsü, ta shiogo.

Bodhbarnü US Congress nung züngsemtem den jembiba mapang, US Pacific Command nung Commander, Admiral, Harry Harris-i, South Korea kümzüka ayutsü asoshi Terminal High Altitude Area Defence (THAAD)-i tarutsü anogotem nung North Korea tashi nokdangba mapa inyaksü, ta ashi.

North Korea-ia ano maneni missile aser nuclear tem tendangtsü shiogo.

Admiral Harris-i, THAAD ya North Korea lenir Kim Jong-un temokok agi tsükidaksütsü masü saka pa shisatsü nüji dangi anir arutsü asoshi yangluba lir, ta ashi.

Bodhbarnü Seongju County, South Korea nung iba oset amenokba asoshi tesem nung aliba nüburtemi ola adoka liasü, ta osangbenertemi ashi.

Iba amenokba ajanga China dena mepeladaksüi aküm kechiba süra iba radar jagi parnok indang military security nunga amshitsü aser tesem nung parnok tashi melenshidaksütsü amai China-i tsübuua bilemer.

North Korea-i missile atonga atonga tendanga ano maneni nuclear tendangba sentong agitsü ta metetdaksüba sülen US Tatong Tir, Mike Pence-i North Korea dang joko Tir Donald Trump ojanga tendangang ta tetuyuba agütsü.

Mongulbarnü US meyong tzu telung nung jajaba rong ka, USS Michigan Korea peninsula nung raratsü atema ayuba rongtem den densemogo. Item rong ajakji aircraft carrier, USS Carl Vinson-i anir lir.

Saka, North Korea-i US

indang aircraft carrier ji tzu telungi ludaksütsü aser sahisashia amaksü ta shiogo.

US senator tem parnok nisung 100 nem tetuyuba balaka agütsüba sülen, Tir Donald Trump-i North Korea atema kechi koma renema lir, iba osang US nung tongtibang ketdangsertemi sangdongogo.

"North Korea-i parnok indang nuclear, ballistic missile loksatsüsa Trump-i parnok nungshitsü nükjidong tebilemba lir. Iba mapaji North Korea den rongsenkettsüng tesendaktep ajanga nokdanga yur inyaksü," ta US Secretary of State, Rex Tillerson, Defense Secretary, Jim Mattis aser Director of National Intelligence, Dan Coats nungeri sangdong ka ajanga metetdaksü.

US-i Tanga North Korea den shishilemba masütsü tenokdangba yua lir aser shinokisa parnok den amalitepa inyakdir 'blacklist'-i yoktsü terenemba lir.

## Afghanistan tensa jungdaksütsü Russia-i yaritsüla:Pakistan

**Moscow, April 27 (Agencies)** : Afghanistan tensa tajungba kümdaksütsü asoshi Russia-i anir inyaksüla, ta Brihostibarnü Pakistan Defence Minister Khawaja Asif-i ashi.

"Afghanistan tensa jungdaksütsü asoshi Pakistan-ia mapa ajak nung nungita yarittepsü," ta Asif-i Russia nungi Defence Minister Sergei Shoigu den senden amendang ashi.

Asif-a 6buba Moscow Conference on International Security nung adentsü asoshi oa liasü, ta osangbenertemi ashi.

"Alima ya süngjema makümer, aser iba tensa nung asenok ajaki teti kiralongrartem anema raratsü jembir," ta Shoigu-i ashi.

Iba senden nung Asif-i

Kashmir tebilemtsü indang ashidang pai, iba tensa ya mazüoktetra tesem nung yimjung aser tesünep tsütsü timtem adoktsü, ta ashi.

"Kashmir tebilemtsü ya UN temzüng ozüng kübok bentettsüla," ta Pakistan Defence minister-i ashi.

Asif-i, Kashmir tebilemtsü ya tangatettep tajung agi inyaktepsü India-i memulunger, ta India aija ashi.

"Pakistan-i iba tebilemtsü atema yimjung agi inyaksü merangba ajunga India-i mashileni agir," ta pai ashi.

Middle East tensa indang jembiba mapang pai, April 4,

2017 nü mim mozü amshia Khan Sheikhoun jila amakba ajanga US-i Syria amakbaji tangar kati pi inyakyim nung teka aitsü merangba lir, ta ashi.



PARIS, APRIL 27, 2017: April 27 nü Paris, France nung Tir election mezüng shilem indang osang angashiba sülen rara adokdang lanurtemi bottle tem mereploksüba noksa nung angur.

## India aser Poland na aluyimba tsütsü tenangzüktep sign asü

**Warsaw, April 27 (Agencies)** : Brihostibarnü India aser Poland aluyimba tsütsü osang tsüsang aser technology lemsatepsü asoshi tenangzüktepba ka nung sign sütepogo.

Iba tenangzüktep nungji India tenung nung Minister of State of Small Industries, Giriraj Singh-i sign asü aser ibaji ajanga linük ana tsüingda aluyimba tsütsü amalitepa inyaksü aser tesendaktep tajung nung shishilemba tsütsü terenlok bener arutsü nükjidong lir.

Iba tenangzüktep nung sign sütepba sentongji India Tatong Tir Mohammad Hamid Ansari aser Poland Ato Kilonser Beata Szydlo na sensaksem mapang tatsüka agiba sülen agia liasü.

Linük anaprongi iba tesendaktep tali tashi taitba kümdaksütsü asoshi mining,

chiyungtsü meraksadaksüi ayuba aser defence tsütsü pei akokba yari temulung agüja inyaksü bangjemtep.

Ansari-i Poland anogo asemnü asoshi semdanga liasü aser iba mapang pai Poland Tir Andrzej Duda dena ajurutepogo aser Andrzej-ia taküm kümsa India semdangtsü sentong lir.

Ansari-isa ano Poland Senate nung Speaker dena ajuruteptsü sentong lir.

Ministry of Economic Development, Poland-i Brihostibarnü ayongba business senden ka nung Ansari-i tongti o jembitsü.

Iba sentong nung linük ana nungi shishilembar tetsüti aser company 150 shi adentsü.

Tan semdangba mapang Ansari-i ano India nungeri tongti lokti balalatem dena ajuruteptsü sentong lir.



LE GRAU DU ROI, APRIL 27, 2017: Taküm France Tir atema toktepla, French National Front (FN) party nungi candidate, Marine Le Pen-i Grau-du-Roi nung nübuyim sentong agitsü asoshi ango apuba rong ka nung mener mao tsüingda la pusemertem den temeim lemsatepba noksa nung angur.



**Mkg nung BVP branch lapokogo**



Cure Foundation Mokochung tanurtemi shilem agiba yangi noksa nung angur.

**Mokokchung, April 27 (TYO):** Bharat Vikas Parishad (BVP) Northeast Region Additional Secretary General Northeast Region, Wb. Swadesh Ranjan Goswami-i Brihostibarnü yangi MMC complex nung sentong ka agia Mokochung nunga BVP Branch tenzüksüogo.

BVP ya 1963 küm tenzük aser iba ya political party kecha dena sentaktepa mali, loktiliba aser sobaliba nükmen yur tentetba mulungtet telok ka lir aser iba telok yagi tangar dak menendaki linük asoshi lenla balala nung terenlok mapatem inyaker, ta Swadesh Ranjan Goswami-i metetdaksü.

Paisa BVP-i education tsütsü, anema aliba tsütsü, tzu mopung wazüka ayuba, nübur nem service agütsüba, legal aid aser training agütsüba, konang tetushi agütsüba (national awards), teka mapa balala, senotsü teyari agütsüba aser lokti asoshi kinük pezüsü terenlok inyakra indang mapatem power point ajanga noksa dena lemsatepa liasü.

Iba sentong nung tetushi tesemdanger Mokochung ADC Sachin Jaiswal IAS, Mokochung Branch BVP tir Akangnungba Ao, BVP Mokochung Chief Adviser Imtisanen parnokia mapang tatsütsü agia o jembi. Iba sentong nung Aren Changkiri menden liasü. School Compound Youth Director, Lanuzulu aser Cure Foundation Mokochung nungi tanurtem ken ajanga shilem agi. Missionary Longjenti Kichu-i BVP Mokochung branch asoshi temoatsü meshia sarasademtsü.

BVP nung züngsem kümnür kar danga lira mulungsoa agizüksü, ta BVP Mokochung Branch ketdangsürtemi metetdaksü.

*Moatsü*  
2017  
**CHUCHUYIMLANG**

Date: 3<sup>rd</sup> May, 2017 Time: 10:00 AM Venue: Anü Mai Amphitheatre

**CHIEF GUEST**

**Shri. T. IMKONGLEMA, IAS**  
Agriculture Production Commissioner  
&  
Commissioner & Secretary, Agriculture  
Govt. of Nagaland

**COMPERES**  
Ms. Anenia Jamir & Ms. Narola Pongen

**ORDER OF PROGRAMME**

Invocation : Shri. Akangtemsü, Asso. Pastor C.B.C

Welcome Address : Shri. Tsükjemtangit, Secretary Chuchuyimlang Village Council

Moatsü Opening Act : Medemsanger (I/c. Lijem Research & Heritage Society)

Short Speech : Shri. Limasangwa, Chairman Unger Village Council (5Mns)

Moatsü Medley (I) : Yaongyimchen Village (Phom)

Short Speech : Shri. Imyangluba, Chairman Salulamang Village Council (5Mns)

Moatsü Medley (II) : Moluyangoong Cultural Club, Yaongyimsen

Short Speech : Shri. S. Yanger, Chairman Kellingmen Village Council (5Mns)

Moatsü Medley (III) : Chungliyimti Village (Sangtam)

Speech : Chief Guest

Moatsü Extravaganza : (I) National Institute of E- Learning & Information Technology, Chuchuyimlang (II) Yaongyimti New (Chang)

Vote of Thanks : Shri. Meyiyapang Pongener Member Tourism Organizing Committee

*Moatsü Feast*

**JANGJASHITSÜR**

Tir Yimyim 22nd Feb.2017 adok nung Longjakrep Semchir, dak sendakba ken o koba Kichuzar aser Ochichar indang agütsüa ali, ozü yim ana nungbo kin ana ya kecha putu nunga lisema maru nung par otzüji kecha meteta mali.

Anungji Yimnasanger (Yimjenkimong & Moayimti) 21-04-17 anogo Yimjenkimong nung telongjem Senden mena 22nd Feb 2017, Tir Yimyim local paper nung adokja-a aliba nungji onok madener ta o lepdang agütsür.

Sd/- **PURKUMZUK** Moayimti

Sd/- **TAKOMENDANG** Yimjenkimong

Office of the  
**DIMAPUR AONOKPU SENSO TELONGJEM**  
DIMAPUR - 797112 - NAG ALAND  
**METETDAKTSÜR**

21st April, 2017 Nagaland Post, 24th April, 2017 Tir Yimyim nung Aonokpu Village Council-i Senso Mongdang jatepbaji, Senso Temzüng nung mela-a mali. Anungji Dimapur Aonokpu Senso Telongjem iba Mungdang nung madentsü lemtet.

Sd/- **Lipokmeren Ao** President, DAST

Sd/- **Yanger Longkumer,** Secretary, DAST.

**SÜR KÜM KA AJUNGBA**  
Lt. Rongsentemjen Jamir (28.4.2016)

**Temeim kodanga majentsü. - 1 Corinth 13:8.**

Na onok den meliaka ne majenba temeim aser temoatsütem onok den lir.

Tanü item temoatsütem ajak asoshi Tsüngrem nem tenüngsang agüja, na menungraa amonger.

- Temeim Kinungertem.

**POSTPONED**

This is to inform to all the concern that the Tzurangkong Students' Conference (T.K.M.) Raffle Draw in aid of 27 N.S.F. Conference 2017 scheduled to be drawn on April 29, 2017 is postponed to May 20, 2017 due to some unavoidable technical circumstances.

We regret the inconveniences caused and urge the members and well wishers to kindly bear with us.

Sd/-  
President, T.K.M

**CHAKPA MOATSÜMUNG SENTONG**  
**Tayonger : Arju Nunger**

**TONGTI TESEMDANGER:**  
**Wb. Temjen Imna Along Lkr**  
Co-Convenor (Finance) & State Executive Member BJP Nagaland

**Anogo : 1st May 2017** **Mapang: 10:00 Am**

**Tesentepdak : Saisapong Lenden**

**TEMETETSÜ:**

- Iba sentong nung sensosanger aser anükapang ajak pelashishia jaker.
- Iba sentong takok angutsü asoshi amangbapur ajaki sarasadema atadi.

Office of the  
**JANGPETKONG SENSO MUNG DANG**  
H.Q: Alongkima  
**SANGDONGER**

72 buba Jangpetkong Senso Mungdang ajanga lemtetba ama Tzükong nungja temelenshi Changkikong melen "JANGPETKONG" ta official inyakyim aser züluyim ajak nung kija aser lokti tentet ajaki amshitsü 09.04.16 anogo sangdong agütsüogo, maneni iba temelenshi nungja kasaji ajatsü tanaben lephsia metetdaksür.

Kija aser lokti kari danga aibelena amshira Jangpetkong Senso Mungdang ajanga tapet mera agütsü sangdonger.

Sd/- **Nungsangtoshi** President, JSM

Sd/- **J.Chubatoshi** General Secretary, JSM

**SANGDONGER**

Süngdong lu ayimer atema agüja aliba Nursery farm nungi item süngdong (Saplings) peria angutsü :

- Pine Tree (three types)
- Ongpangsülem (Alder)
- Kisamen (Kokon)
- Aou (Hollock)
- Yongjhak
- Eucllyptus (Citro)
- Coffee

**SHIM KI MPCS, Nursery Farm**  
Marepkong Ward, Mokochung  
No. 9862127345

**MEYIPA AGIADOKER**

Tir Yimyim adok 185 April 25, 2017 nung Akhojak Chandang (B) timtem nung lir ta sür adoktsüba-ji ni yimten den kecha tangatetep makai kü molung agi sangtong nung ni meyipa agiadoker.

Sd/- **I.Sashi Lkr**



## Badminton Asia Championships: PV Sindhu Quarterfinal-i iogo



**New Delhi, April 27 (Agencies) :** Olympic nung silver medal angula, India tsür P V Sindhu Brihostibarnü Badminton Asia Championships tanabuba round asaya koka quarterfinals tongogo.

Rio Games nung silver agulai 21-14, 21-15 agi Japan tsür Aya Ohori madak takok angu. Wuhan Sports Center Gymnasium nung lai iba asaya

medal angula, Saina Nehwal, HS Prannoy aser tarep asayartembo Bodhbarnü mezüing asaya nung tsükatok.

Iba asayamung nung tang India nungi arishi küm 21 tain, Sindhu ang anünga lir aser quarter final nung la China tsür He Bingjiao den asayatsü ataa lir.

Tebur kija asaya mezüingbuba round nung China nung world no 5, Tian Houwei akoksang, Jayaram-i tanabuba round nung game anaprong nung tamakok anguba ajanga quarter final metongtet.

Tetsür aser tebur temeyoktep tarep asaya nung India nungi Pranaav Jerry Chopra aser N Sikki Reddy nata Zheng Siwei aser Chen Qingchen na den minute 50 asayaba sülen 15-21, 21-14, 16-21 agi tamakok angu.

Sikki shiba tebur tarep nung Ashwinin Ponnappa tena süir asayar, tenatia South Korea nung Chae Yoo Jung aser Kim So Yeong na den minute 37 asaya aser 20-22, 16-21 agi tamakok angu.

minute 40 tsüingda nung akok. Aji oda süaka India nung Ayaj Jayaram bo tanü second round asaya nung Chinese Taipei nungi Hsu Jen Hao madak 19-21, 10-21 agi tamakok angu.

World number 3, Sindhu-i iba asayamung mezüingbuba round nung Indonesia tsür Dinar Dyah Austine madak 21-8, 21-18 agi takok angu.

London Games nung bronze

## Frolic Cup Quarter Final asaya osang

**Dimapur, April 17 (Agencies):** 5buba Frolic Cup Medziphema, Local Ground nung tang tasayadak lir. Tanep mezüingbuba asaya nung taoba küm takoker Tsiepama Youth Organisation aser Medziphema Village Youth Organisation (MVYO) na asayaa liasü.

Asaya nung mezüingbuba goal MVYO nungi jersey No. 7 Khriese-i agüja liasü aser iba sülen mapang kobi melei TYO nungia jersey No. 15 Kumzua-i goal ka agüja goal kasa dang aküm. Asaya tatem tashi nung goal 1-1 dang liasü aser ibayongji iba telok ana tsüingda penalty metsüteptsüsa aküm. Telok anaprongla nungi goal keeper-i kanga junga ball nokdanga pungubenben metsütepba sülen goal 2-2 dang liasü. Iba sülen MVYO puri penalty 6buba metsüba goal post nung ondaker adok saka TYO goal keeper-i aibelen mesüi goal metsüoktsüba ajanga parnoki

goal 3-2 agi iba asaya akok. Asayamung nung mezüingbuba red card iba asaya nung MVYO nungi jersey No. 4 Asui nem agütsü.

Tanabuba quarterfinal asaya KYC 'B' aser Winfield Club na asayaa liasü. Telok anapronglai kanga junga asayaba ajanga terprangertem kanga jangratemdakja liasü. Asaya mezüing buba shilem nung KYC 'B' nungi asayar jersey No. 47 Letkhokai-i mezüingbuba goal inoktsü, iba sülen asaya tatem kasa telok nungi jersey No. 11 Nyithung-i goal tanabuba agüja parnoki asaya 2-0 agi akok. KYC 'B' nung asayar Hamping jersey No.4, aser Anam jersey No. 3 na asayar yimya shitak mamshiba atema merenshia liasü.

Khanakhurü Students' Union aser Sporting Club, Phaipijang na tsüingda tasembuba quarterfinal asaya

nung KSU puri goal 4 agi ayong ayonga koka semifinal-i iogo. KSU nungi asayar Ninja, jersey No.8, Rhitso, jersey No.9 aser Salu, jersey No.11 nungeri goal agüja liasü. Salu-i iba asaya nung goal ana agütsü.

Anogo pezübuba asaya Khanglai FC aser Molvom Youth & Students' Union na asayaa liasü. Asaya mezüingbuba shilem nung Thangkhoahao-i goal ka agütsüba ajanga Molvom Youth & Students' Union-i tera agi Khanglai FC madak takok angu. Iba asaya nung Khanglai FC nungi asayar Lalminthang aser Molvom Youth & Students' Union nungi asayar Temjenwati na nem yellow card agüja liasü.

**Hokolbarnü Semi-Final asaya yamai alitsü:**

1. Khanakhurü Students' Union vs Tsiepama Youth Organisation, 1:00 pm.
2. KYC 'B' vs Molvom Youth and Students' Union, 3:30 pm.

## Bayern Munich-i Kingsley Coman alizük

**Berlin, April 27 (Agencies):** Bayern Munich-i France nung winger Kingsley Coman Juventus nungi euro million 21 (\$23 million) agi alizükogogo, ta Brihostibarnü osang ka ajanga metetdaktsü.

Arishi küm 20 tain asayar ya 2015 nungi loan nung Bayern den asaya liasü aser tang pa den küm 3 iba club nungi asayatsü asoshi kulizüingtepogo.

"Kingsley Coman ya ozü telok tarutsü asoshi tongtibang

lir, anungji onoki pa alitsü asoshi lemtet. Kingsley ya kanga dang asayar tajung ka lir aser pai onok nem taruba kümtem nung teyari agütsütsü ta imlar," ta Bayern mendenbuba Karl-Heinz Rummenigge-i ashi.

Bayern puri pa alizükba sen jenjang mesangdong saka osang ajanga ashiba euro million 21 shi asütsü.

Coman den külemi Brazil nung winger Douglas Costa na, Franck Ribery mesüra

Arjen Robben na taruba küm contract atemba sülen melenzüktsü asoshi teimla nung club nung aniokogogo.

Tang tashi nung Coman France team nungi 11 ben asayaago aser Bundesliga nung 17 ben asayaba nung goal 2 agüja lir.

Taruba Honibarnü Bayern puri Wolfsburg akok aser tanabuba jenjang nung aliba RB Leipzig-i Ingolstadt mekokra parnoki German league champions 5 ben buba akoktsü.



**APRIL 2Y, 2018 ASAYA**  
Kolkata **VS** Delhi - 8:00 PM  
Punjab **VS** Hyderabad - 4:00 PM  
**APRIL 27, 2017 ASAYA OSANG**  
Gujarat-i wickets 7 agi Bangalore akok.

## YFC mezüingbuba Final Kohima nung asayatsü

**Dimapur, April 27 (TYO) :** Yoddha Fighting Championship (Yoddha FC) ya pan India Mixed Martial Arts asayamung ka lir aser iba sentong ya Martial Arts-i ayonga agir, koba tesüiba küm 3 tashi India tesem balala (Dimapur, Mumbai, Bangalore, Mokochung, Bhubaneshwar, Delhi) nung asayaa arur.

Iba asayamung mezüing mongpu nung India nung lanur sempet kar aika jangjaogo.

Iba asaya nung asayartemi final atongtsü asoshi toktepa asayar aser tang kari Strawweight, Bantamweight, Featherweight, Lightweight aser Welterweight telemsatem

nung semi final tonga lir.

YFC mezüingbuba mongpu atema semi final aser final Kohima, Nagaland nung asayatsü sentong lir.

Anogo asemnü munga asayaba mapang temang touzük telemsa balala shia nungi takoker kaka shimtetsü. Iba asayamung ya April 27, 28 aaserd 29, 2017 anogotem nung Indira Gandhi Indoor Stadium, Kohima nung akatsü. Iba asayamung nung tetsürtema MMA asaya nung shilem agitsü. Iba asayamung nung shilem agitsü asoshi Naga nung athlete aikati toktepa aruogo aser parnoki iba asayamung nung adentsü maongka nguteta lir.

## Stuttgart: Ita 15 tennis masayadaksüi alila Sharapova-i mezüing asaya takok angu

**Stuttgart, April 27 (Agencies) :** Shi temang nung tashi balaka itdaksütsü asoshi achiba mozü, koba nokdang lir, ibaji achiba ajanga ita 15 tashi tennis asaya nungi nokdang alila, Maria Sharapova-i Bodhbarnü 7-5, 6-3 agi Roberta Vinci madak Stuttgart asayamung nung takok nguogo aser ibai ita 15 sülen la asoshi mezüing asaya nung takok angurba lir.

Takok anguba sülen lai, "Ibai alima nung jangratemtsü tulutiba lir," ta takok anguba sülen ashi. Tesüiba mapang world no 1, Sharapova-i iba asaya kanga junga takok angu.

La dak Australian Open 2016 nung meldonium mozü achiba putetba ajanga tennis asaya nungi nokdanga liasü.

"Tennis court nung tetsüing ajemokba ya jangratemtsüka lir. Ni lanuwa asüdang nungi ibai kü sabang lir aser iba sabang ya ni asoshi khenyongi balaka lir," ta Sharapova-i Porsche Arena nung iba takok anguba sülen agi.

Sharapova nem Stuttgart asayamung nung shilem agitsü asoshi wildcard agütsü. Iba asayamung takok marok ya lai asemben tashi bena lir. La nem wildcard agütsüba asoshi pa den toktepertemi ola adoka liasü.



**Tanurbo tanur dang !**  
**Yimtong nung ayokba**  
**chiyongtsütem achitsübasä !**  
**Tetsü shia teinyaktsü timji.**  
**Tanur temang anepalua**  
**anema lidaktsütsübaji lir**

**LIVSAV FOR KIDS**

**NEW PACK**  
Comminative Appetite Enhancer

Manufactured by Medhita Research Health Products Pvt. Ltd. Thane (Maharashtra),  
CUSTOMER CARE:- 0226-4401182

**BIEMDANGANG**  
"Nai kecha meinyaker nung Tsüngrem dang temoatsü meshibaji tamashi"